



UCAPAN YAB DATUK HAJI HASNI BIN MOHAMMAD

MENTERI BESAR JOHOR

MESYUARAT KETIGA (BELANJAWAN JOHOR 2021)

BAGI PENGGAL PERSIDANGAN KETIGA

DEWAN NEGERI JOHOR YANG KE-14

26 NOVEMBER 2020 (KHAMIS)

“BERDAYA TAHAN DEMI KEMAKMURAN”

Pendahuluan

1. Assalamualaikum Warahmatullahi Wabarakatuh. Segala puji bagi Allah, Tuhan Sekalian Alam. Selawat dan Salam Kepada Junjungan Kita Nabi Muhammad S.A.W, kepada Keluarga dan Sahabat Baginda, Tabi' Tabi'in dan para Ulama, semoga memperoleh ihsan Allah di hari pengadilan kelak.
2. Terlebih dahulu, patik ingin merafak sembah menjunjung Kasih dengan ucapan setinggi-tinggi tahniah dan ucap selamat kepada Duli Yang Maha Mulia Sultan Ibrahim Ibni Almarhum Sultan Iskandar, Sultan Yang Dipertuan bagi Negeri dan Jajahan Takluk Johor Darul Ta'zim, sempena Sambutan Ulang tahun Hari Keputeraan Duli Yang Maha Mulia Tuanku pada 22 November 2020 bersamaan 6 Rabiulakhir 1442 Hijrah.
3. Saya mohon izin, Dewan Yang Mulia ini, untuk membentangkan peruntukan perbelanjaan kerajaan bagi tahun 2021, atau Belanjawan Negeri Johor 2021.
4. Belanjawan ini dirangka dalam saat paling getir dan mencabar bagi Negeri Johor. Saat yang tidak pernah dilalui oleh mana-mana Kerajaan Johor Moden yang terdahulu.
5. Kita benar-benar berada dalam *a very unprecedented circumstances*. Bukan sahaja kita berhadapan dengan pandemik yang merbahaya, tetapi nadi ekonomi kita hampir terhenti, kerana penutupan sempadan dan perintah kawalan pergerakan yang bersilih ganti.
6. Semua ini pula berlaku dalam keadaan harga minyak global berada pada paras terendah dan iklim politik negara yang tidak stabil. Globalisasi pula *is in a state of retreat*, akibat pintu-pintu sempadan antarabangsa majoritinya masih lagi ditutup.
7. Johor sangat terkesan dengan semua ini. Ekonomi kita menguncup, pengangguran kita meningkat, pelaburan baru kita berkurangan, perniagaan terpaksa menghentikan operasi, kuasa beli rakyat semakin merosot dan kutipan hasil negeri terjejas dengan teruk.
8. Namun, tugas sebenar kerajaan negeri ialah mengurus keadaan ini dengan sebaik-baiknya, dalam apa jua keadaan. Walau sebesar mana konflik dan krisis yang tiba, tiada kerajaan yang patut tewas dan mengalah.

9. InsyaAllah, Kerajaan Negeri Johor akan sedaya upaya memaparkan keupayaannya, untuk menangani apa jua gelora yang menghimpit. Bagi saya, rakan-rakan EXCO dan penjawat awam negeri, apa yang Johor sedang lalui kini, adalah *the real test of leadership. And I believe we will collectively overcome it.*

Yang Berhormat Tuan Speaker,

10. Maka pada hari yang penting ini, saya ingin membentangkan Belanjawan Negeri Johor bagi tahun 2021. Belanjawan yang akan menguruskan krisis, dan membendung himpitan, yang sedang dialami rakyat di luar Dewan ini.
11. Sebelum itu, saya ingin membuat penegasan yang sangat penting dan sepenuh jujur.
12. Pertama, tiada kerajaan yang mampu memberikan segalanya kepada semuanya, dengan sebanyaknya, tatkala berada dalam himpitan yang luar biasa waktu ini.
13. Kedua, belanjawan ini, pelaksanaan dan keberkesanannya, sangat tergantung kepada tiga perkara, iaitu secepat mana pandemik ini akan berakhir, sepantas mana sempadan Johor akan dibuka dan sekerap mana perintah kawalan pergerakan akan dilaksanakan pada masa hadapan.
14. Ketiga, belanjawan ini, bukanlah pengakhiran. Ia adalah permulaan dan penerusan kepada usaha kita dalam membantu mereka yang terjejas. Dan setiap kali kita membantu, *we will be better and we will overcome our weaknesses.* Kerana zaman kerajaan tahu semua perkara, tidak patut wujud dalam konteks semasa.

Yang Berhormat Tuan Speaker,

15. Pentadbiran saya tidak akan berselindung dengan retorika bahawa, segalanya akan menjadi baik dan segalanya akan mampu kerajaan uruskan. Pentadbiran saya akur, bahawa ada perkara yang di luar kawalan kerajaan. Kerana itulah, kita akan sentiasa bersifat realistik dan bertanggungjawab.
16. Saya juga ingin menyeru semua Ahli-Ahli Dewan yang mulia ini, agar bersolidariti demi Johor yang sangat kita cintai.

17. Inilah waktunya, untuk kita membuktikan bahawa ideologi yang berbeza, fahaman politik yang berlainan dan pendirian kita yang pelbagai, tidak akan mengatasi kecintaan kita kepada Negeri Johor Darul Ta'zim!
18. Bahawa, pada hari ini, kita semua bersidang dalam semangat bermuafakat. Kita adalah rakyat Johor. Kita adalah Bangsa Johor. Atas rasa simpati dan penuh kesedaran maka, kerajaan Johor melalui Southern Volunteers akan menghantar bakul makanan bagi rakyat Johor dan Malaysia yang terkandas di Singapura. Usaha ini dilakukan bersama-sama pejabat Pesuruhjaya Tinggi Malaysia di Singapura dan Malaysia Association in Singapore.
19. Dan, dengan didorong semangat yang patriotik kepada Negeri Johor Darul Ta'zim, kita boleh mengemukakan Belanjawan Johor 2021 ini sebagai usaha bersama, demi kebajikan rakyat dan pemulihan ekonomi negeri kita.

Tema dan Objektif Utama Belanjawan Johor 2021

Yang Berhormat Tuan Speaker,

20. Tema Belanjawan Johor 2021 adalah “Berdaya Tahan Demi Kemakmuran”. Ini selari dengan keadaan semasa setiap batang tubuh rakyat Johor di luar sana. Mereka sedaya upaya, berpegang pada apa yang ada, demi kelangsungan hidup hari esok yang entah siapa tahu pengakhirannya.
21. Kita harus berterima kasih kepada pentadbiran yang terdahulu, yang telah mewariskan kita sumber-sumber yang, mungkin tidaklah banyak, tetapi mencukupi. Cukup, untuk kita mengharungi ujian ini dengan yakin dan cermat.
22. Saya yakin dan pasti, kisah-kisah kemakmuran Negeri Johor akan kita ulangi bersama sekali lagi. Iaitu kisah-kisah kemajuan ekonomi dan kesejahteraan rakyatnya. Namun begitu, sekarang adalah masa untuk kita berdaya tahan. Sekuat dan semampu boleh.

23. Sekarang juga adalah masa untuk kita menumpukan sepenuh sumber yang ada bagi menata cara-cara baharu untuk menggapai kemakmuran bersama. Insya-Allah, seusai semua musibah ini berlalu pergi nanti.
24. Maka, segala pertimbangan dalam Belanjawan 2021 ini, dipandu oleh 3 Objektif Utama. Objektif-objektif ini bertujuan untuk sedikit sebanyak memberi bantuan dan pengupayaan kepada semua, untuk menempuhi masa yang getir ketika ini.
25. Pertama - Menjamin Ketahanan dan Kelangsungan Ekonomi.
26. Kedua - Memperkasa dan Memberdaya Tahan Kebajikan Rakyat Johor
27. Ketiga - Menjamin Kesejahteraan dan Kemakmuran Rakyat Johor

Senario dan Unjuran Ekonomi Global, Negara & Negeri Johor

a) Senario dan Unjuran Ekonomi Global

28. Adalah sangat sukar untuk membuat unjuran, ramalan dan membangun senario ekonomi untuk Tahun 2021. Ini kerana, Johor, Malaysia malah seluruh dunia terus berada dalam keadaan ketidaktentuan.
29. Kita tidak tahu bilakah pandemik ini akan berakhir, bilakah Malaysia akan menerima vaksin dan secepat mana vaksinasi dapat dilaksanakan setelah ditemui kelak. Bilakah sempadan negara akan dibuka? Dan setakat manakah hasil boleh dikutip dalam keadaan yang tidak menentu ini.
30. Pemulihan ekonomi global akan kekal tidak sekata dalam tempoh terdekat. Prestasi ekonomi antarabangsa tahun 2021 masih akan terkesan oleh lanjutan kejutan permintaan dan penawaran atau *demand and supply shock*, penutupan sempadan, kejatuhan harga komoditi, gangguan rantai bekalan serta kelumpuhan pasaran maju.

31. Ringkasnya, kita bukan sahaja berhadapan dengan “*the New Great Depression*”. Tetapi kita sedang menghadapi era “*slowbalisation*”. Iaitu era penguncupan, era kelembapan dan era penyusutan mega secara global.
32. Bank Dunia pula meramalkan bahawa seramai 115 juta penduduk dunia dijangka terjerumus ke dalam lembah kemiskinan pada tahun 2020.
33. Menjelang tahun 2021 pula, seramai 150 juta penduduk dunia akan terperangkap dalam kemelut kemiskinan melampau, dengan pendapatan kurang daripada 1.90 Dollar Amerika atau RM 7.89 sehari.

b) Senario dan Unjuran Ekonomi Negara

Yang Berhormat Tuan Speaker,

34. Malaysia, sebagai sebuah negara sedang membangun, tidak terkecuali daripada menerima impak krisis ekonomi ini. Kesannya, setakat September 2020, sebanyak 32,000 perusahaan kecil dan sederhana (PKS) di seluruh negara telah menamatkan operasi mereka. Dengan bahasa mudah, mereka sudah tutup kedai. Ia dijangka akan bertambah buruk dan bakal mengakibatkan ratusan ribu rakyat kehilangan pekerjaan.
35. Pertumbuhan ekonomi Malaysia diunjurkan bakal menyusut sebanyak 4.5% pada tahun 2020. Ia akan kembali pulih pada tahun 2021, pada kadar 6.5 - 7.5%.
36. Namun begitu, ada pakar ekonomi yang tidak sependapat dengan angka tersebut, kerana ia adalah terlalu optimistik. Lebih-lebih lagi disebabkan oleh pelaksanaan Perintah Kawalan Pergerakan Bersyarat (PKPB) yang sentiasa bersilih ganti dan *on and off*, akibat usaha mengekang COVID-19.
37. Tambahan lagi, Institut Penyelidikan Ekonomi Malaysia (MIER) telah meramalkan bahawa, gelombang ketiga COVID-19 bakal melambatkan pemulihan ekonomi negara hingga ke suku pertama tahun 2021.

c) Senario dan Unjuran Ekonomi Johor

Yang Berhormat Tuan Speaker,

38. Sesungguhnya, perjalanan pemulihan ekonomi Negeri Johor masih lagi jauh. Kita amat terkesan dengan gelombang ketiga pandemik ini, melalui pelaksanaan semula PKP serta sempadan negara yang masih belum dibuka sepenuhnya.
39. Lihat sahajalah ekonomi Negeri Johor pada tahun 2020 diunjurkan menyusut sebanyak 3% hingga 5%. Ia adalah lebih teruk daripada penyusutan nasional. Ini kerana kebergantungan dinamik Johor kepada aktiviti rentas sempadan dan perdagangan antarabangsa. Juga kesan limpahan daripada kemelesetan ekonomi Singapura serta momentum pertumbuhan ekonomi yang kurang memberangsangkan pada tahun 2019, yang hanya pada kadar 2.7% sahaja.
40. Yang amat membimbangkan, dianggarkan 5% hingga 10% PKS di Negeri Johor terpaksa tutup perniagaan akibat gangguan aliran tunai. Jelasnya, penutupan sempadan negara telah mengakibatkan permintaan menjunam dan persekitaran ekonomi menjadi semakin suram.
41. Johor harus mengakui bahawa, ekonominya akan mengalami keluk pemulihan berbentuk-K. Sesetengah industri memaparkan pemulihan, manakala industri lain terus jatuh merudum.
42. Contohnya, sektor pelancongan dan sektor penerbangan merupakan sektor yang semakin terkesan pada ketika ini. Sebaliknya, sektor pertanian, sektor pembuatan, perdagangan borong dan runcit, perkhidmatan kewangan dan industri ICT sedang dan akan terus memaparkan pemulihan yang ketara.
43. Pemulihan keluk-K ini juga amat nyata dalam kalangan masyarakat. Misalnya, golongan B40, M40 dan mereka yang bekerja sendiri mahupun yang telah kehilangan mata pencarian. Secara langsung, kualiti kehidupan mereka juga tergugat dan jurang ketidaksamarataan ekonomi akan semakin ketara.

44. Insiden kemiskinan mutlak Negeri Johor atau *poverty incidence* yang direkodkan pada kadar 3.9% bagi tahun 2019, dijangka akan meningkat sehingga kadar 6 - 8% pada tahun 2020.
45. Insiden kemiskinan tegar pula yang sebelum ini pada kadar 0.2% akan meningkat sehingga mencecah 2% hingga 2.5% pada tahun 2020.

Yang Berhormat Tuan Speaker,

46. Kadar pertumbuhan ekonomi negeri Johor bergantung kepada 5 faktor iaitu: Pertama, kecekapan kita dalam mengekang gelombang pandemik baru daripada berlaku di Johor. Kedua, pembukaan ataupun penutupan berterusan sempadan antarabangsa kita. Ketiga, pemulihan ekonomi negara Singapura. Keempat, prestasi ekonomi negara rakan dagang Negeri Johor dan kelima, dasar serta suntikan baharu dari kerajaan persekutuan.
47. Kesemua ini membentuk satu latar dan asas yang memaparkan kepentingan dan kegentingan Belanjawan 2021.
48. Atas dasar itu, saya ingin menegaskan yang kerjasama antara agensi kerajaan, pihak swasta, pemimpin komuniti, setiap rakyat Johor malah antara ADUN-ADUN Kerajaan dan Pembangkang, sangat diperlukan untuk membangunkan kembali ekonomi negeri.
49. Berbekalkan muafakat dan kesungguhan kita bersama, saya percaya bahawa Negeri Johor boleh mencapai pertumbuhan ekonomi sekitar 6.6% hingga 7.6% pada tahun 2021.

Impetus Ekonomi Baharu

Yang Berhormat Tuan Speaker,

50. Strategi pemulihan ekonomi Johor akan dipacu oleh tiga agenda. Ketiga-tiga agenda ini akan menjadi katalis kepada usaha pemulihan dan ketahanan ekonomi kita.
51. Ianya adalah:
 - a. Agenda Jaminan Bekalan Makanan Negeri Johor (Johor Food Security Agenda);
 - b. Agenda Johor Digital; dan
 - c. Penubuhan Johor Economic, Tourism and Cultural Office (JETCO) di Singapura.

a) Agenda Jaminan Bekalan Makanan Negeri Johor

52. Ramai yang bertanya, mengapa Agenda Jaminan Bekalan Makanan? Why Food Security? Ada apa dengan Sektor Pertanian tatkala landskap ekonomi global berhadapan dengan kelembapan berikutan impak COVID-19 dan Global Trade War.
53. Di sini saya utarakan beberapa fakta berkenaan Sektor Pertanian dan Industri Makanan di Johor:
54. Johor merupakan pengeluar terbesar beberapa produk makanan utama negara, seperti ayam pedaging, pada 284 juta iaitu 23.3% daripada pengeluaran dalam negara dan 1.638 juta metrik tan buah-buahan iaitu 35% daripada pengeluaran dalam negara.
55. Johor juga merupakan pengeksport utama produk pertanian ke negara-negara seperti Singapura, Hong Kong dan Timur Tengah. Ke Singapura sahaja, jumlah eksport pertanian kita mencecah RM 8.17 bilion iaitu USD 2 bilion setiap tahun.
56. Ini menandakan jika perancangan teliti dijalankan bagi menentukan right crops dan right products, nilai eksport akan meningkat dengan ketara dan menjana pendapatan baru bagi ekonomi negeri.

57. Johor juga bukan sahaja berada di kedudukan yang strategik malah mempunyai aset semulajadi seperti tanah yang subur serta tenaga kerja sedia ada.
58. Terdapat lebih kurang 160,000 usahawan dalam sektor pertanian dan industri makanan. Saya ingin mengambil kesempatan ini untuk mengucapkan jutaan terima kasih kepada wira yang tidak didendang, iaitu usahawan sektor ini. Mereka telah menyumbang kepada Keluaran Dalam Negara Kasar (KDNK) sebanyak 16.2%, bersamaan RM 16.25 bilion ringgit.
59. Bayangkanlah. Jika segala potensi Sektor Pertanian dan Industri Makanan Negeri Johor ini dapat digembleng, diperkemas dan ditambah nilai. Dan dipacu pula dengan Advanced Agri Tech serta kerjasama Awam dan Swasta (PPP). Ia dapat menjadi antara sumber hasil terbesar Kerajaan Negeri Johor pada masa hadapan.
60. Namun begitu, sektor ini harus diberi pendekatan berbeza. Ia perlu diberi nafas baru yang lebih segar dan sesuai. Apakah pendekatan-pendekatan yang ditekankan dalam menjayakan agenda ini?
61. Pendekatan pertama - "Agriculture is a game of volume", intervensi dalam rantai nilai pertanian melalui penggunaan teknologi, dan pengoptimuman penggunaan aset semula jadi seperti tanah, tenaga kerja dan infrastruktur yang berkaitan dijangka dapat meningkatkan jumlah pengeluaran makanan yang berkualiti secara berfasa.
62. Kedua - Memaksimakan potensi negeri Johor sebagai destinasi bagi pelabur luar dan pemain industri yang strategik. Ini membolehkan kerajaan negeri mengambil peluang dalam membangunkan Projek Katalitik yang memberikan impak lebih besar dari segi komersil dan faedah sosio ekonomi. Pelaburan dari Negara Singapura, Timur Tengah dan China adalah antara potensi yang boleh diterokai.
63. Ketiga - Peluang pekerjaan baru yang bernilai tinggi terutama sekali dalam bidang pertanian moden, agro ekologi, agro pelancongan, agri business marketplaces, bioteknologi dan industri hiliran bagi sektor makanan.
64. Bagi Agenda Jaminan Bekalan Makanan ini, beberapa langkah awalan Kerajaan Negeri yang merangkumi:

65. Pertama, Penubuhan Jawatankuasa Sekuriti Makanan Negeri yang melibatkan pihak berkepentingan seperti agensi kerajaan mahupun pemain industri bagi memastikan perancangan Dasar Agro Makanan Negeri Johor dan strategi pelaksanaan setiap inisiatif berjalan dengan lancar.
66. Kedua, Kerajaan Negeri akan memberi galakan dalam bentuk insentif tertentu bagi mengoptimumkan penggunaan mana-mana tanah yang berada di bawah program Tanaman Kekal Pengeluaran Makanan (TKPM), Zon Pelaburan Makanan Negeri (ZPMN) dan Zon Tanaman Makanan (ZTM) bagi tujuan pemakanan, sama ada yang telah diusahakan atau yang masih belum lagi diusahakan.
67. Ketiga, Kerajaan Negeri telah mendapat sokongan sepenuhnya daripada kerajaan Persekutuan dengan suntikan dana tambahan secara terus sebanyak RM 35 juta melalui PENJANA. Peruntukan ini akan diterjemahkan dalam beberapa bentuk inisiatif di bawah Strategi Johor Tani. Jutaan terima kasih diucapkan kepada kerajaan Persekutuan.
68. Keempat, kita akur bahawa penyertaan pihak swasta dan pelabur-pelabur adalah penting dalam menjadikan sektor ini moden, dinamik dan berdaya saing. Bagi tujuan ini, kerajaan Negeri akan bekerjasama dengan beberapa pihak sama ada agensi di peringkat persekutuan mahupun pemain industri dalam usaha meningkatkan nilai komersil industri hiliran makanan dan market access bagi produk “made in Johor”.
69. Selain daripada itu, dalam usaha pengurusan tanah yang merupakan aset utama sektor ini, beberapa inisiatif akan diperkenalkan oleh Kerajaan Negeri:
70. Inisiatif pengurangan 50% daripada denda ubah syarat melalui Program pemutihan “Approval Over Submission (AOS) Pertanian kepada Pertanian (POKOK)” akan dilaksanakan bermula 1 Januari 2021 sehingga 31 Mac 2021. Seramai 16,857 pekebun kecil akan mendapat manfaat dengan pengurangan denda sebanyak RM 8.2 juta daripada kerajaan Negeri. Inisiatif ini dapat membantu pekebun yang mengusahakan tanah di bawah 10 ekar untuk memperoleh lesen Lembaga Minyak Sawit Malaysia (MPOB) dan pensijilan Malaysian Sustainable Palm Oil (MSPO). Inisiatif ini juga terbuka bagi semua jenis pertanian (pokok) dan tidak terhad kepada permohonan penukaran syarat nyata kepada kelapa sawit sahaja.

71. Kita dapat lihat sumber ekonomi Negara barat yang maju seperti Belanda bergantung sepenuhnya dengan sektor pertanian dan makanan. Mereka telah mempelopori penggunaan teknologi moden dalam pertanian dan pemasaran komersial.
72. Dengan langkah awalan di atas, saya yakin Agenda Jaminan Bekalan Makanan ini merupakan pemangkin sumber ekonomi baru Negeri Johor dengan usaha sama semua pihak.

Yang Berhormat Tuan Speaker,

b) Agenda Johor Digital

73. Sejak pandemik COVID-19 mula menular, teknologi digital telah memberi kemudahan kepada orang ramai untuk terus melangsungkan kehidupan.
74. Pandemik COVID-19 telah merevolusi cara kita bekerja, cara kita berhubung, pergi ke sekolah, dan membeli barang keperluan harian.
75. Pandemik ini yang kita hadapi telah menjadi pemangkin terbesar untuk kerajaan negeri dan Sektor Swasta mentransformasi tatakelola mereka ke arah digital.
76. Oleh itu, kesediaan digital tidak lagi menjadi pilihan. Perubahan ke arah era pendigitalan bukan lagi satu paksaan. Ia mesti dilakukan sekarang. *Embracing the digital agenda is a must and a necessity. It is not a luxury, not even a choice.*
77. Untuk itu, sudah tiba masanya untuk Kerajaan Negeri Johor untuk melaksanakan Agenda Johor Digital. Satu agenda yang disokong demi meraih laba dari manfaat yang datang bersama agenda ini.
78. Saya berhasrat agar, menerusi Agenda Johor Digital ini, rakyat Johor dan negeri akan memperoleh 3 tempas seperti berikut:
79. **Pertama** - Ekonomi Johor akan lebih pesat membangun, dipacu oleh ekonomi digital. Apabila ekosistem ekonomi digital sudah menjadi kebiasaan kepada semua, kerajaan negeri akan mendapat sumber hasil baharu yang konsisten dan terjamin.

80. **Kedua** - Agenda Johor Digital akan memberikan limpahan sosio-ekonomi kepada rakyat Johor. Bagaimana? Setiap tindakan, dasar dan polisi kerajaan, samada di peringkat yang paling bawah hingga yang teratas akan berpandukan data. Maka rakyat sudah tidak perlu khuatir mengenai ketirisan, kronisme dan amalan pilih bulu dalam inisiatif kerajaan.
81. **Ketiga** - Agenda Johor Digital akan dibangunkan dengan melibatkan semua pemegang taruh, semua komuniti perniagaan dan agensi-agensi kerajaan yang berkenaan. Tujuannya? Untuk meningkatkan keyakinan pelabur terhadap keupayaan dan komitmen Johor. Bahawa Johor mampu menyediakan infrastruktur berkaitan untuk menarik pelaburan-pelaburan mereka.
82. **Keempat** - Agenda Johor Digital akan memberikan tempias langsung kepada sektor modal insan Johor. Bagaimana? Lebih banyak pekerjaan yang bakal dicipta dan lebih banyak peluang untuk anak-anak Johor pulang ke negeri dan berkhidmat di sini. Sudah tentu, peluang pekerjaan yang akan wujud bukanlah sikit, dan tidak bergaji kecil.
83. Ada yang skeptikal dengan agenda ini. Kata mereka “kita tak nampak apa-apa lagi?”. Saya ingin memberi jaminan bahawa dalam tahun hadapan, kita akan benar-benar boleh #LuaskanKuasaDigital. Apa caranya?
- a. **Pertama** - kerajaan negeri dalam perancangan untuk menjadikan kawasan Medini dan Educity di Iskandar Puteri sebagai Hab Digital Johor. Infrastruktur-infrastruktur yang merangsang aktiviti ekonomi digital akan dibina. Insentif-insentif kepada individu dan pemain-pemain industri juga akan giat diberikan;
 - b. **Kedua** - Menubuhkan Majlis Digital Johor yang berperanan merangka pelan pembangunan strategik dan hala tuju digital Negeri Johor;
 - c. **Ketiga**, merangka Pelan Induk Digital Negeri Johor yang merangkumi aspek tranformasi sektor kerajaan, pemerkasaan industri dan pembudayaan dalam kalangan masyarakat menjelang 2030;
 - d. **Keempat**, Digital Johor Corporation atau “DJ Corp” akan ditubuhkan. Syarikat ini bertindak sebagai institusi pelaksana atau

delivery unit dan penyelaras kepada Agenda Johor Digital merentasi semua pemegang taruh yang terlibat.

c) Johor Economic, Tourism and Cultural Office (JETCO) di Singapura

84. Pandemik ini memberi pengajaran sangat besar tentang pentingnya sektor-sektor ekonomi, dan betapa luar biasa sumbangannya kepada kemajuan ekonomi dan kemakmuran Johor.
85. Sukacita saya mengumumkan bahawa Johor Economic, Tourism and Cultural Office (JETCO) di Singapura telah mendapat persetujuan daripada kerajaan persekutuan. JETCO Singapura adalah merupakan entiti yang pertama seumpamanya. Saya berterima kasih kepada Yang Amat Berhormat Perdana Menteri dan Yang Berhormat Menteri Luar Negeri kerana menyokong penuh penubuhan pejabat ini.
86. Dengan penubuhan JETCO Singapura ini, Johor telah melangkah ke era baharu dalam usaha menarik pelaburan asing ke dalam negeri. Buat masa sekarang, di awal penubuhannya, terdapat dua tugas penting entiti ini.
87. Tugas pertama, JETCO Singapura adalah untuk mempromosi prospek pelaburan ke Negeri Johor. Tidak kira berapa pun jumlahnya, JETCO akan memudahkan semua jenis pelaburan.
88. Tambahan lagi, penutupan sempadan menyedarkan kita betapa rumitnya pergantungan beberapa sektor-sektor ekonomi kepada tenaga kerja rentas sempadan. Justeru, Johor akan menggunakan kesempatan ini, bagi meyakinkan pemain industri dan komuniti perniagaan Singapura untuk beroperasi di Johor.
89. Sebagai menggandakan usaha ini, fungsi INVEST JOHOR akan diperhebatkan. INVEST JOHOR akan bekerja rapat dengan JETCO di Singapura untuk menarik pelaburan terpilih dari negara seperti China, Taiwan, Jepun dan Korea. Fokus segera ialah menawarkan Johor sebagai destinasi mesra pelabur yang bernilai tinggi.
90. Pada masa yang sama, bagi menyokong usaha-usaha diatas, satu kajian secara menyeluruh akan dilaksanakan bagi menyediakan dokumen Pelan Induk Pelaburan Negeri Johor 2020-2030 yang komprehensif dalam konteks ekonomi semasa.

Yang Berhormat Tuan Speaker,

91. Ahli-ahli ekonomi sependapat bahawa, *do not let this pandemic go to waste*. Setiap krisis, terutama sekali pandemik akan memberikan peluang kepada umat manusia mereformasi, memperbetulkan dan memikir kembali strategi survival dan kelangsungan mereka.
92. Maka, apakah strategi survival dan kelangsungan Negeri Johor selepas ini? Seperti yang saya sebutkan di atas, kerajaan kita telah membentangkan 3 Impetus Ekonomi Baharu yang bakal mereformasi struktur ekonomi Johor.
93. Namun begitu, perjalanan yang bakal ditempa masih lagi jauh. Dan sokongan serta cadangan semua amatlah didambakan seadanya.

Pembangunan Wilayah Utara Johor

94. Selain daripada itu, bagi memacu pembangunan di kawasan utara Johor kerajaan negeri amat mengalu-alukan pengumuman Y.A.B. Perdana Menteri bagi pembangunan ZON EKONOMI PAGOH berkeluasan 4 ribu ekar. Zon Ekonomi Pagoh akan menjadi platform bagi syarikat-syarikat gergasi untuk beroperasi dan menjadi penanda aras bagi pembangunan lestari. Antara sektor industri yang diberi tumpuan termasuklah industri perkayuan dan perabot.
95. Kerajaan Negeri akan memberikan komitmen sepenuhnya melalui penglibatan aktif dalam Majlis Pembangunan Pagoh dan Gambir.
96. Selanjutnya, Pembangunan TAMAN PERINDUSTRIAN BUKIT GAMBIR seluas 110 ekar di Daerah Tangkak juga merupakan projek pemangkin sebagai lanjutan daripada kajian yang telah dijalankan sebelum ini. Taman perindustrian ini akan memberikan kesan limpahan ekonomi yang positif kepada pertumbuhan ekonomi setempat dan Utara Johor. Pembangunan ini juga akan memanfaatkan Hab Pendidikan Pagoh yang sedang dibangunkan.

Strategi Kewangan Belanjawan 2021

Yang Berhormat Tuan Speaker,

97. Seterusnya, izinkan saya memberi gambaran kedudukan kewangan Negeri Johor bagi tahun 2021.
98. Pada tahun 2021, unjuran hasil Negeri Johor adalah sebanyak RM1,609.07 juta. Manakala unjuran perbelanjaan pada tahun 2021 adalah sebanyak RM1,857.21 juta. Senario ini menunjukkan Belanjawan 2021 adalah Belanjawan defisit iaitu sebanyak RM248.14 juta.
99. Bagi perbelanjaan mengurus yang merangkumi caruman kepada Kumpulan Wang Pembangunan, jumlahnya adalah RM997.21 juta dan jumlah ini terdiri daripada:
 - a. Emolumen RM513.69 juta; dan
 - b. Perbelanjaan lain-lain RM483.51 juta.
100. Anggaran Perbelanjaan Pembangunan pada tahun 2021 pula akan diperuntukkan sebanyak RM850 juta yang akan ditampung melalui Kumpulan Wang Pembangunan.
101. Keseluruhannya, perbelanjaan tersebut adalah bagi melaksanakan mengikut 12 Agenda Utama.
102. Sehubungan itu, harus juga diberi perhatian bahawa kutipan hasil dan kedudukan defisit bergantung kepada kestabilan ekonomi Negeri Johor. Kestabilan ekonomi ini, dipandu oleh faktor-faktor seperti berikut:
 - a. **Pertama**, kejutan ekonomi akibat gelombang pandemik baru;
 - b. **Kedua**, kecekapan perbelanjaan;
 - c. **Ketiga**, keberkesanan penyampaian belanjawan ini; dan
 - d. **Keempat**, pembukaan semula sempadan Malaysia dan Singapura.

103. Strategi Kewangan Belanjawan 2021 adalah seperti berikut:

- a. **Pertama**, belanjawan ini telah mengoptimumkan segala sumber yang ada pada kerajaan negeri. Ini termasuklah melalui Pihak Berkuasa Tempatan (PBT) Negeri Johor dan *Government Linked Companies* (GLC) Negeri.
- b. Pihak Berkuasa Tempatan akan memperuntukkan sebanyak RM562 juta bagi pelaksanaan inisiatif-inisiatif pembangunan, kebajikan dan menangani COVID-19.
- c. Kerajaan negeri melalui *Government Linked Companies* (GLCs) juga membantu di dalam menjayakan inisiatif pembangunan di Negeri Johor.
- d. **Kedua**, belanjawan ini akan berpandukan konsep "*counter-cyclical measures*". Kerajaan negeri akan menanggungkan usaha-usaha konsolidasi fiskal pada masa yang akan datang, sehingga ekonomi negeri kembali mengembang.
- e. Ya, belanjawan ini adalah belanjawan yang defisit. Dalam situasi ekonomi seperti sekarang, kita harus berbelanja lebih daripada biasa, mengikut sumber yang sedia ada dan berfokus.

**Strategi Pelaksanaan Belanjawan 2021: 12 Agenda Kebajikan,
Keberdayaan dan Keberhasilan Utama
(Johor 12-21)**

Yang Berhormat Tuan Speaker,

104. Belanjawan kali ini akan memberi fokus kepada 12 Agenda Kebajikan, Keberdayaan, dan Keberhasilan Utama. Kesemua 12 agenda ini, merupakan Strategi Pelaksanaan Belanjawan 2021.
105. Pelbagai pihak dan sektor dalam 12 agenda ini menerima pengagihan peruntukan, pemberian tunai, insentif cukai dan insentif bukan monetari lain demi menjayakan Tiga Objektif Utama Belanjawan Johor 2021.

Johor Tani

106. Agenda pertama adalah Agenda Johor Tani. Seiring dengan Agenda Jaminan Bekalan Makanan Negeri Johor, sebagai langkah awal sekurang-kurangnya RM51 juta akan diperuntukkan untuk mentransformasikan pertumbuhan sektor pertanian dan industri makanan.
107. Sektor Pertanian merupakan antara sektor industri pemacu utama ekonomi Negeri Johor.
108. Saya berharap agar jabatan-jabatan berkenaan dan organisasi di peringkat akar umbi akan menjadi agen perubahan dan pemudah cara dalam pelaksanaan inisiatif yang akan dijalankan oleh kerajaan negeri seperti berikut:
 - a. **Pertama**, Program Jaminan Bekalan Makanan akan dibangunkan dengan peruntukan sebanyak RM6 juta ringgit dengan melibatkan kawasan tanaman seluas 2,168 hektar. Inisiatif ini merangkumi projek pembangunan industri pengeluaran tanaman makanan utama seperti padi, kelapa, taman agromakanan dan pertanian moden.
 - b. **Kedua**, bagi menghargai komitmen para pesawah di Kawasan Periuk Nasi Selatan dalam Negeri Johor, Kerajaan memperuntukkan sebanyak RM6 juta ringgit bagi Program Peningkatan Hasil Padi di Luar Jelapang.
 - c. **Ketiga**, fokus untuk meneroka pasaran baru bagi mengeksport makanan diteruskan dengan beberapa inisiatif strategik iaitu:
 - i. Program Pembangunan Komoditi Berpotensi bagi memangkin penanaman *healthy natural food*, yang mempunyai permintaan yang tinggi dari luar negara. Program ini diberi peruntukan sebanyak RM790 ribu ringgit. Inisiatif ini disasarkan kepada pengusaha herba, madu, kopi, rempah ratus dan cendawan; dan
 - ii. Program Pembangunan Pertanian Lestari dengan peruntukan sebanyak RM1 juta ringgit untuk membantu para pengusaha memiliki sijil-sijil pengiktirafan seperti

myGAP dan myOrganic bagi membantu penembusan pasaran yang lebih luas.

d. **Keempat**, bagi membangunkan usahawan tani pula, beberapa inisiatif kerajaan negeri telah dirangka antaranya:

- i. Program Pembangunan Industri Asas Tani dan Program Perintis Keusahawanan Johor dengan peruntukan sebanyak RM1.3 juta ringgit akan disalurkan untuk menambah baik bengkel sedia ada dan bantuan pembelian mesin dan peralatan. Program ini akan memberi manfaat kepada 190 orang usahawan tani.
- ii. Dalam usaha untuk mengembalikan minat pertanian dan memenuhi permintaan komuniti, sejumlah RM4.8 juta telah diperuntukan melalui peruntukan PENJANA dan PBT Negeri Johor. Ianya merangkumi Program Pertanian Komuniti samada yang berskala kecil dan berbentuk komersil.

e. **Kelima**, untuk usaha industri ternakan daging dan ruminan, kerajaan negeri akan melaksanakan beberapa inisiatif termasuk:

- i. Memperuntukkan RM 400 ribu ringgit bagi Program Pengeluaran Makanan Ternakan melalui konsep *Homeplot*;
- ii. Memperuntukkan RM 2.5 juta ringgit untuk Pembangunan Hub Pedaging Ruminan;
- iii. Menyediakan RM 1 juta ringgit untuk Pembangunan Lembu Tenusu;
- iv. Memperuntukkan RM 1 juta ringgit bagi Pembangunan Unggas; dan
- i. RM1 juta ringgit untuk Pembangunan Lembu Integrasi dan Pembangunan Industri Makanan.

109. Selain itu, Pelaksanaan Agro Mix-Farm Fasa 2 dan Fasa 3 akan diperluaskan di Daerah Segamat dengan pertambahan keluasan 110 ekar melalui peruntukan sebanyak RM2 juta dalam tempoh 5 tahun.

110. Untuk menghargai syarikat-syarikat peneraju dan pengusaha dalam Sektor Pertanian dan Agromakanan, Kerajaan Negeri buat pertama kalinya akan menyediakan geran sebanyak RM2 juta ringgit. Geran ini adalah untuk Program Kolaborasi Syarikat Peneraju dan Pengusaha.
111. RM3 juta ringgit pula adalah untuk Program Pemilikan Teknologi Mekanisasi menerusi:
 - a. Geran bernilai RM10 ribu bagi pengusaha kecil;
 - b. Geran Padanan 50:50; dan
 - c. Geran Padanan Komersial 50:50.
112. Untuk mempertingkatkan pemasaran hasil pertanian ahli-ahli Pertubuhan Peladang Kawasan, Kerajaan Negeri memperuntukkan sebanyak RM 500 ribu ringgit bagi Pusat Pengumpulan Hasil Pertanian di Benut dan Kluang.
113. Sukacita dimaklumkan bahawa 58% keluasan tanaman nanas di Malaysia adalah dari Negeri Johor. Sehubungan itu, Kerajaan Negeri dengan kerjasama Lembaga Perindustrian Nanas Malaysia (LPNM) akan meningkatkan pengeluaran nanas negara dengan peruntukan sebanyak RM 19 juta ringgit oleh Kerajaan Persekutuan.
114. Inisiatif ini melibatkan projek perluasan kawasan tanaman di seluruh Johor. Tumpuan bakal diberikan kepada Industri Nurseri Benih Nanas Premium. Tambahan lagi, kerajaan negeri sedang mengusahakan penglibatan pelabur dari luar negara untuk terlibat dalam rantai nilai industri nanas premium.
115. Untuk menjamin kelestarian habitat dan kelangsungan sumber perikanan, Kerajaan Negeri untuk permulaan akanewartakan 5 kawasan sebagai Zon Industri Perikanan (ZIP) Negeri Johor. Zon ini adalah untuk ternakan ikan air tawar di Mawai, Kesang Laut dan Parit Keroma untuk ternakan kupang serta Kukup dan Sungai Johor untuk ikan marin.

116. Selain itu, Projek Pembangunan dan Pengurusan Akuakultur Bersepadu Negeri Johor akan dilaksanakan dengan melibatkan beberapa projek bersasar. Projek tersebut adalah pembangunan induk benih berkualiti, ternakan ikan air payau, ikan air tawar, ikan hiasan dan juga kerang-kerangan dengan peruntukan sebanyak RM 2.9 juta ringgit. Ini juga termasuklah bantuan perkakas dan peralatan peranti pengumpulan ikan yang bernilai RM 200 ribu ringgit.
117. Akhir sekali, pembangunan data dan jaminan keselamatan ternakan dan hasil laut akan dijalankan. Kerajaan negeri akan memperuntukkan sebanyak RM360 ribu ringgit kepada Jabatan Perikanan Negeri Johor untuk pelaksanaan inisiatif ini. Ini bertujuan untuk membangunkan Profil Kualiti Air Sungai Dan Pengurusan Sumber Secara Lestari selari dengan agenda Johor Digital yang akan saya huraikan.

Johor Digital

118. Kerajaan negeri akan terus memberi tumpuan kepada pelaksanaan Agenda Johor Digital. Agenda ini merupakan agenda yang penting bagi melakar tatakelola ekonomi masa hadapan, atau *the economy of the future*.
119. Bagi menyokong Agenda Johor Digital, Kerajaan Negeri akan terus memberi tumpuan kepada pelaksanaannya yang amat penting untuk kita semua.
120. Kerajaan Negeri berbesar hati mengumumkan bahawa rakyat Johor bakal mendapat manfaat daripada pelaksanaan agenda digital seperti berikut:
 - a. Kerajaan negeri akan memastikan manfaat daripada pelaksanaan Pelan Jalinan Digital Negara (JENDELA) oleh Suruhanjaya Komunikasi dan Multimedia Malaysia (SKMM) benar-benar dinikmati oleh rakyat Johor. Dianggarkan RM2.5 bilion akan dilaburkan bagi tujuan ini yang sebahagian besarnya melalui pelaburan langsung pemain industri dan selebihnya daripada pihak kerajaan.
 - b. Manfaat ini merangkumi penambahan menara komunikasi baharu dan penaiktarafan alat pemancar komunikasi di menara sedia ada secara komersial oleh pembekal perkhidmatan. Inisiatif ini akan meningkatkan liputan 4G di seluruh Johor dan menjadi asas kepada peralihan teknologi 5G.
 - c. Seterusnya, lanjutan kepada inisiatif sebelum ini, kerajaan negeri akan melaksanakan projek Johor WiFi 2.0 dengan peruntukan RM10 juta untuk 5 tahun. Ini bertujuan meluaskan lokasi capaian internet termasuk di kawasan luar bandar.
121. Bagi memperkasa ekonomi digital di Negeri Johor, kerajaan negeri sedang melaksanakan beberapa inisiatif seperti berikut:
 - a. **Pertama**, meningkatkan kerjasama strategik dengan pemain-pemain industri *e-marketplace* di negara ini melalui platform e-dagang yang dikenali sebagai Johor *E-Marketplace* dengan peruntukan RM500 ribu;
 - b. **Kedua**, meningkatkan keupayaan transaksi tanpa tunai;

- c. **Ketiga**, kerajaan negeri juga menghargai usaha yang dilaksanakan oleh pihak Iskandar Investment Berhad dalam memperkasa Teknologi Dron dan Robotik dengan kos sebanyak RM5 juta; dan
 - d. **Keempat**, kerajaan negeri akan mengambil langkah untuk menjadikan jalur lebar sebagai utiliti ketiga selepas elektrik dan air di setiap kawasan pembangunan yang baru. Ini bagi memastikan rakyat Johor sentiasa terhubung dengan akses jalur lebar yang menyeluruh dan berkualiti.
122. Selain itu, kerajaan negeri akan memperkenalkan program Pendidikan Siber untuk Pelajar Johor yang melibatkan pelajar sekolah rendah dan menengah yang celik dan bijak dalam penggunaan internet.
123. Jabatan Agama Islam Negeri Johor dan Bahagian Sains, Teknologi dan ICT Negeri Johor akan meneruskan pelaksanaan Projek Pendidikan Islam Digital (JPID) Fasa 2 dengan peruntukan RM8 juta bagi tempoh 5 tahun. Projek ini bakal membangunkan kandungan pembelajaran digital dalam talian yang memanfaatkan kesemua 571 buah Sekolah Agama Kerajaan dan 2 buah Sekolah Menengah Agama Kerajaan Johor.
124. Kerajaan negeri turut giat menjalinkan usaha sama strategik dengan agensi-agensi kerajaan mahupun swasta yang berkaitan, bagi usaha pemerkasaan sektor keusahawanan, terutamanya dalam usaha transformasi digital dan platform pemasaran usahawan.

Yang Berhormat Tuan Speaker,

Johor Niaga

125. Agenda Ketiga adalah Agenda Johor Niaga. Kita akui, kelembapan ekonomi akibat perintah kawalan pergerakan dan penutupan sempadan telah memberi kesan kepada pelbagai sektor perniagaan.
126. Maka, inilah masanya kerajaan negeri menggandakan usaha menjana semula dan memulihkan ekosistem ekonomi, demi kelangsungan perniagaan.
127. Inisiatif-inisiatif yang bakal diambil adalah:
 - a. **Pertama**, bagi membolehkan lebih ramai usahawan PKS mendapat pembiayaan perniagaan, kerajaan negeri akan memperkenalkan satu skim pembiayaan PKS iaitu *Johor Niaga - Bank Rakyat SME Loan* yang akan diusahakan secara bersama dengan Bank Rakyat.
 - b. Dana berjumlah RM100 juta akan disediakan kepada usahawan PKS dengan kadar faedah yang munasabah dan syarat yang lebih longgar, khusus untuk PKS yang layak dari Negeri Johor sahaja.
 - c. **Kedua**, bagi meringankan beban para penjaja dan peniaga, kerajaan negeri akan melaksanakan Pengecualian Bayaran Lesen Penjaja, Lesen Peniaga PKS, Mikro, Sewa Premis dan Gerai, Sewa Tapak Pasar Malam dan Pasar Pagi selama setahun berkuat kuasa dari 1 Januari 2021.
 - d. **Ketiga**, bagi menggalakkan perniagaan kecil-kecilan bertapak, pihak Perbadanan Usahawan Johor Berhad (PUJB) dan PBT seluruh Johor akan menyediakan ruang dan peluang berniaga yang bersesuaian kepada peniaga kecil serta pengusaha *foodtruck*.
 - e. **Keempat**, kerajaan negeri akan bekerjasama dengan Amanah Ikhtiar Malaysia (AIM) untuk Program Pembiayaan Sahabat Johor dalam memberi pembiayaan mikro kredit kepada golongan miskin dan berpendapatan rendah. Pembiayaan tanpa cagaran dan tanpa penjamin akan memanfaatkan seramai 2,396 sahabat AIM yang terkesan dengan COVID-19.

- f. **Kelima**, usaha sokongan dan latihan kepada sektor PKS juga akan dipertingkatkan melalui beberapa inisiatif. Antaranya:
- i. Geran Orang Lokal 3.0 akan digandakan daripada RM1.5 juta kepada RM3 juta bagi membantu meningkatkan produktiviti 240 pengusaha PKS
 - ii. Skim Peningkatan Kapasiti Dan Pembangunan PKS (*Johor Entrepreneurs Enhancement Programme - JEEP*) iaitu bantuan pembiayaan perbelanjaan modal akan dilaksanakan dengan peruntukan RM1 juta;
 - iii. Insentif RM300 ribu kepada PKS untuk membuka akaun semasa dan pendigitalan usahawan melalui *SME Go Digital* serta pendaftaran harta intelek; dan
 - iv. Sejumlah RM2 juta akan diperuntukkan menerusi Program Pembangunan Setempat. Program ini bakal membantu petani dan pengusaha industri kecil sederhana untuk menyediakan modal, peralatan dan latihan. Program ini akan dilaksanakan oleh Perbadanan Usahawan Johor Berhad (PUJB) dan Jabatan Pertanian Negeri Johor.
128. Pihak Iskandar Investment Berhad (IIB) akan membangunkan Hab Inovasi Iskandar dalam usaha menyokong syarikat-syarikat *start-up* di Johor dengan kos pembangunan sebanyak RM2 juta.
129. Ini menunjukkan penglibatan sektor swasta dan sektor berkepentingan lain amatlah penting bagi menggugahkan semula komuniti PKS di Johor.

Yang Berhormat Tuan Speaker,

Prasarana Johor

130. Peranan infrastruktur dan prasarana tidak boleh dinafikan. Keperluan pembangunan prasarana bukan sahaja untuk memastikan pembangunan ekonomi negeri kekal maju namun juga demi kebaikan rakyat bagi menjalani aktiviti harian mereka. Maka, Agenda Keempat adalah Prasarana Johor.

a) Penyambungan Projek Berimpak Tinggi Negeri Johor

131. Dalam kesempatan ini, kerajaan negeri ingin mengambil peluang untuk berterima kasih kepada kerajaan persekutuan yang telah mengumumkan peruntukan bagi tujuan penyambungan projek-projek berimpak tinggi di Johor seperti:
- a. Kereta Api Berkelajuan Tinggi (HSR) Kuala Lumpur - Singapura;
 - b. Landasan Berkembar Elektrik Gemas - Johor Bahru;
 - c. Sistem Transit Rapid (RTS) daripada Johor Bahru ke Woodlands; dan
 - d. Sistem Bus Rapid Transit (BRT).
132. Bagi projek RTS, 40% daripada jumlah keseluruhan kerja berkaitan pembinaan struktur yang dianggarkan bernilai RM800 juta akan dibuka dan dianugerahkan kepada kontraktor Johor yang layak dan kompeten.

b) Perumahan

133. Selain daripada sektor pengangkutan, prasarana yang sangat bermanfaat untuk rakyat Johor ialah perumahan. Kerajaan Negeri amat berbesar hati mengumumkan beberapa insentif bantuan perumahan yang akan dilaksanakan pada tahun depan.
134. Untuk makluman sehingga kini terdapat sebanyak 21,479 unit Perumahan Mampu Biaya telah siap dibina dari 2014 hingga 2019.

135. Salah satu inisiatif tersebut ialah projek pembinaan Rumah Mampu Biaya Johor (RMBJ) kerjasama syarikat swasta dan syarikat berkaitan kerajaan (GLC) di daerah Kluang, Tangkak, Johor Bahru, Batu Pahat dan Pontian dengan peruntukan berjumlah RM310 juta bagi tempoh 5 tahun.
136. Sebagai tambahan, 4 projek Taman Perbadanan Islam akan turut dibangunkan di Pontian, Batu Pahat dan Johor Bahru melalui PIJ Holdings.
137. Kerajaan negeri berhasrat untuk meningkatkan sasaran pembinaan RMBJ agar dapat dimiliki oleh golongan sasar iaitu B40, M40 dan anak muda.
138. Selaras dengan itu, kerajaan negeri akan memastikan pembinaan RMBJ diselarikan dengan perumahan lain menerusi penambahbaikan Dasar Perumahan Rakyat Negeri Johor. Kerajaan negeri juga akan memastikan tiada lagi pembinaan rumah mampu biaya yang dilaksanakan hanya pada fasa akhir sesebuah projek.
139. Pemberian baucar kepada pembeli Rumah Mampu Biaya Johor (RMBJ) akan diteruskan dengan peningkatan daripada RM1 ribu kepada RM3 ribu. Baucar ini diharapkan dapat membantu menampung kos memasuki kediaman baru.
140. Kerajaan negeri juga komited untuk melaksanakan inisiatif pengecualian sewa Program Perumahan Rakyat (PPR) dan Rumah Sewa Kerajaan (RSK) bersasar sepanjang tahun 2021. Inisiatif ini akan memberi manfaat kepada 70% penyewa bermula 1 Januari 2021.
141. Manakala, sebanyak RM10 juta diperuntukkan untuk meneruskan dan memperbanyakkan projek perumahan di bawah Skim Perumahan Makmur Johor (SPMJ).
142. Dengan kerjasama PBT, kerajaan negeri akan memperkenalkan Kempen Transisi 2.0 dalam tempoh satu tahun bermula 3 Januari 2021 untuk terus menggalakkan pemaaju membina rumah mampu biaya.

143. Sebagai tambahan kepada pelaksanaan Rumah Mesra Rakyat di Johor oleh kerajaan persekutuan, kerajaan negeri juga bersetuju untuk melaksanakan pembinaan Rumah Ihsan Makmur Johor (RIMJ) dengan peruntukan sebanyak RM20 juta daripada Tabung Amanah. Dianggarkan sebanyak 400 unit rumah akan dibina melalui inisiatif ini.
144. Di samping itu, kerajaan negeri dengan kerjasama Maybank memperkenalkan satu Program Sewa Beli. Program ini bakal meringankan bebanan wang pendahuluan untuk pembeli-pembeli rumah.
145. Untuk membantu penyewa-penyewa rumah pula, Bantuan Bayaran Sewaan Rumah Sewa akan dilaksanakan melalui MAINJ dengan peruntukan berjumlah RM800 ribu.
146. Bagi golongan bumiputera, kerajaan negeri bersetuju untuk mengadakan Ekspo Hartanah Bumiputera di seluruh Johor dengan peruntukan sebanyak RM1 juta.

c) Perkhidmatan Bas

147. Selain itu, dalam usaha meningkatkan tahap keterhubungan di seluruh negeri, sebanyak RM29 juta diperuntukkan untuk penyusunan semula jajaran Bas Muafakat Johor yang lebih holistik dan cekap. Usaha ini akan melengkapi peruntukan kerajaan persekutuan untuk memperluaskan perkhidmatan bas henti-henti di Johor Bahru.

d) Jalanraya dan Jambatan

148. Dari segi kemudahan jalan raya pula, Kerajaan Negeri akan memperuntukkan sebanyak RM53.4 juta bagi projek jalan dan jambatan di seluruh negeri. Antaranya:
 - a. Pertama, cadangan membina jalan pintas Pekan Nenas dari persimpangan Jalan Pekan Nenas - Tanjung Piai - Jalan Sawah ke Jalan Gelang Patah - Ulu Choh;
 - b. Kedua, cadangan memperelok selekoh bahaya Jalan Muar - Labis;
 - c. Ketiga, cadangan menggantikan pembetung kekotak di Jalan Batu Pahat - Mersing;

- d. Keempat, cadangan menaik taraf persimpangan Jalan Tan Swee Hoe/Jalan Parit Besar;
 - e. Kelima, cadangan membina jalan alternatif dari Jalan Meta ke Jalan Sekakap, daerah Mersing; dan
 - f. Keenam, menaik taraf jalan persimpangan Pekan Nenas Pontian sehingga Persimpangan Jalan Ulu Choh - Tanjung Kupang.
149. Anggaran sebanyak RM 700 juta pula diperuntukkan untuk kerja penyelenggaraan jalan-jalan di bawah MARRIS merangkumi jalan-jalan negeri, bandaran dan kampung.

e) Pengurusan Sumber Air

150. Seterusnya, kerajaan negeri amat komited untuk menjamin kualiti air bersih demi kelangsungan hidup rakyat Johor. Oleh itu, kerajaan negeri bersetuju untuk membangunkan infrastruktur pengurusan sumber air.
151. Antaranya, kerajaan negeri dalam proses menyediakan Enakmen Lembaga Pengurusan Air Johor dan berhasrat menaik taraf Badan Kawalselia Air Negeri Johor (BAKAJ) kepada Lembaga Pengurusan Air Johor bagi memperkasa pengurusan sumber air negeri.
152. Sehubungan itu, Kerajaan Negeri menerusi BAKAJ komited untuk melaksanakan projek menaik taraf baraj Sungai Johor dengan peruntukan sebanyak RM2.5 juta. Projek ini akan menghalang penerobosan air masin ke loji-loji rawatan air serta meningkatkan kapasiti penyimpanan air mentah yang dilepaskan dari Empangan Linggiu.
153. Bagi meningkatkan kualiti air dan mencegah pencemaran sungai, Kerajaan Negeri melalui BAKAJ, menyediakan peruntukan sejumlah RM1.7 juta untuk melaksanakan inisiatif berikut:
154. Pertama, pemantauan secara fizikal dan berkala terhadap sungai-sungai membekalkan air mentah kepada loji-loji rawatan menggunakan teknologi geospatial dengan peruntukan sebanyak RM1 juta; dan
155. Kedua, pembinaan tiga unit sistem pemantauan atas talian untuk memantau pencemaran dan kualiti air Sungai Skudai, Sungai Ulu Benut dan Sungai Muar dengan peruntukan sejumlah RM700 ribu.

156. Selain itu, dengan kerjasama IRDA, Projek Kebolehlaksanaan Loji Rawatan Air Pintar (*Smart Water Treatment Plant*) dan Penggunaan Sumber Air akan dilaksanakan dengan peruntukan daripada Kerajaan Persekutuan sebanyak RM2 juta.

f) Pengurusan Banjir

157. Kerajaan negeri juga prihatin dengan kesan banjir terhadap kehidupan rakyat Johor. Oleh itu, beberapa infrastruktur untuk pencegahan dan kawalan banjir bakal dibangunkan. Antaranya ialah:
- a. **Pertama**, Rancangan Tebatan Banjir, Pengorekan Sungai dan Muara Sungai akan diteruskan dengan peruntukan RM20 juta; dan
 - b. **Kedua**, peningkatan peruntukan penyelenggaraan parit dan saluran kepada RM40 juta.

Modal Insan Johor

158. Agenda berikutnya adalah Agenda Modal Insan. Kerajaan negeri percaya bahawa modal insan adalah penggerak utama Negeri Johor. Tanpa modal insan yang berkualiti, segala pelan pembangunan kita tidak akan berjalan dengan baik.
159. Namun begitu, pandemik COVID-19 telah memperlihatkan iklim pasaran kerja yang begitu rumit. Apa sahaja isu yang timbul di dalam *labour market* ataupun modal insan kita, adalah permasalahan yang struktural sifatnya.
160. Kerajaan negeri tetap memberi perhatian serius kepada pembangunan modal insan di Johor. Antara usaha yang dijalankan adalah:
- a. **Pertama**, Program Latihan Kemahiran Johor, untuk memenuhi kehendak pasaran industri semasa. Program ini akan dilaksanakan melalui Johor Upskilling, Johor Reskilling dan Pensijilan Tenaga Mahir;
 - b. **Kedua**, Program Pembangunan Modal Insan Rapid Transit System (HCDP) untuk membangunkan professional dalam projek dan "Rail Industry" dengan jumlah RM5 juta. Antaranya pelaksanaan Program MRT Young Entrepreneur yang akan diselaraskan oleh JCCD dan MRT Corp.
 - c. **Ketiga**, Kerajaan Negeri akan menjalankan Program Peningkatan Kemahiran serta Latihan Semula dan Keusahawanan dalam sektor minyak dan gas kepada graduan, kontraktor tempatan dan pekerja yang telah diberhentikan;
 - d. **Keempat**, IRDA akan melaksanakan program-program peningkatan kemahiran dan kemahiran semula melalui peruntukan kerajaan persekutuan seperti yang diumumkan pada Belanjawan 2021 dengan peruntukan fasa pertama sebanyak RM8 juta.
 - e. **Kelima**, bagi menyelaraskan inisiatif berkaitan modal insan, Kerajaan Negeri akan memperkasakan peranan Jawatankuasa Pemandu Modal Insan Negeri Johor. Jawatankuasa ini akan menggariskan pelan tindakan dan menangani isu-isu berkaitan modal insan Negeri Johor;

- f. **Keenam**, Program Perantis Iskandar Malaysia akan dilaksanakan oleh pihak *Educity* dalam pembangunan bakat berkaitan industri teknologi terkini. Selain itu, satu Geran Padanan Gaji bagi pekerja tempatan yang diberhentikan juga akan dilaksanakan. Pihak IRDA akan memperuntukkan RM8 juta bagi kedua-dua program tersebut;
 - g. **Ketujuh**, kerajaan negeri akan meningkatkan peluang pekerjaan kepada beberapa golongan khusus seperti pekerja tempatan yang terkesan, graduan dan orang kelainan upaya melalui inisiatif Gerak Kerjaya Johor seperti GerakKerjaya@Outreach, GerakKerjayaJohor@Graduan, GerakKerjayaJohor@OKU, dan GerakKerjayaJohor@Lokal;
 - h. **Kelapan**, kerajaan negeri melalui MAINJ akan menyalurkan bantuan peningkatan ekonomi yang meliputi peralatan bekerja dan latihan kemahiran bernilai RM1 juta; dan
 - i. **Kesembilan**, satu inisiatif ke arah Industri Revolusi 4.0 telah dirangka khas seperti dalam Pelan Induk Pembangunan Kontraktor Negeri Johor untuk meningkatkan keupayaan dan kemampuan kontraktor. Bagi memperkasakan kompetensi kontraktor, Kerajaan Negeri akan melaksanakan program-program berikut:
 - i. Program Peningkatan Kompetensi Kontraktor Johor;
 - ii. Pembangunan aplikasi Monitor Johor; dan
 - iii. Pembangunan aplikasi mudah alih sistem penarafan dan penilaian kontraktor Negeri Johor.
161. Kerajaan negeri menghargai langkah kerajaan persekutuan menubuhkan jawatankuasa khas bagi menambah baik pangkalan data rakyat Malaysia yang bekerja di Singapura yang turut berperanan merangka pelan tindakan bagi membantu golongan ini.

162. Modal Insan Johor tidaklah harus dilihat dalam konteks tenaga kerja semata. Johor harus mula dari awal dalam usaha kita mendidik anak-anak Johor. Bukan untuk menjadi tenaga kerja mahir sahaja, tetapi untuk menjadi rakyat Johor yang seimbang, yang punya sahsiah dan beridentiti murni. Atas kesedaran itu, inisiatif-inisiatif tersebut akan dijalankan:
- a. **Pertama**, kerajaan negeri melalui Yayasan Pembangunan Keluarga Darul Ta'zim akan mengadakan Program Modul Jauhar untuk pembangunan sahsiah kanak-kanak. Ia merupakan modul pembelajaran awal kanak-kanak Taska Yayasan Pembangunan Keluarga Darul Takzim dan akan diintegrasikan dengan elemen-elemen Modul Keluarga Sakinah; dan
 - b. **Kedua**, kerajaan negeri melalui Jabatan Kemajuan Masyarakat (KEMAS) akan memfokuskan kepada penguasaan pendidikan Islam yang meliputi subjek berkaitan Iqra' dan Asas Fardhu Ain (IQFA). Usaha ini akan memberi faedah kepada kanak-kanak berusia 5 hingga 6 tahun dan melibatkan 300 buah Tabika KEMAS Negeri Johor. Ia bakal disertai oleh 5,000 kanak-kanak dengan peruntukan sebanyak RM1.6 juta.
163. Kesemua inisiatif-inisiatif di atas adalah untuk memberi keseimbangan kepada Modal Insan Johor. Agar Modal Insan Johor, pada semua peringkat umur dapat dikenali melalui acuan 'Johor'nya yang tersendiri. Acuan yang berkemahiran, sederhana dan beretika.

Governans Johor

164. Kerajaan Negeri terus beriltizam untuk menambah baik kualiti penyampaian perkhidmatan dan urus tadbir supaya lebih cekap, berintegriti dan memenuhi aspirasi rakyat. Oleh itu, Agenda Kebajikan, Keberdayaan dan Keberhasilan Utama yang seterusnya adalah Governans Johor.

Yang Berhormat Tuan Speaker,

165. Transformasi Governans Johor dapat dilaksanakan melalui pemerkasaan penjawat awam dan inisiatif pemodenan seperti berikut:
- a. **Pertama**, bagi meningkatkan kompetensi dan kapasiti penjawat awam, Kerajaan Negeri telah mewujudkan Akademi Perkhidmatan Tadbir Negeri Johor (*Johor Civil Service Academy*). Badan ini akan menggabungkan program latihan profesional dan program penyelidikan dalam satu institusi demi meningkatkan kompetensi perkhidmatan awam Negeri Johor;
 - b. **Kedua**, kerajaan negeri akan bekerjasama dengan badan-badan profesional bagi membuka ruang kepada penjawat awam negeri untuk memiliki kelayakan profesional dalam bidang teknikal dan bukan teknikal seperti Insinyur (Ir), Surveyor (Sr) dan akauntan bertauliah (C.A.);
 - c. **Ketiga**, kerajaan negeri akan melaksanakan kenaikan pangkat secara *Time Based* Berasaskan Kecemerlangan untuk kali kedua. Ini bertujuan untuk memberikan laluan kerjaya yang lebih baik kepada pegawai kumpulan pelaksana dalam perkhidmatan awam negeri;
 - d. **Keempat**, dalam kesempatan ini, kerajaan negeri juga merafak sembah ta'zim dan menjunjung kasih kepada Duli Yang Maha Mulia Sultan Ibrahim Ibni Almarhum Sultan Iskandar di atas perkenan mengisytiharkan Majlis Perbandaran Pasir Gudang (MPPG) menjadi sebuah Bandaraya berkuatkuasa pada 22 November 2020.

Dengan pemasyhuran Majlis Bandaraya Pasir Gudang ini, ia akan meningkatkan keupayaan MBPG dalam menguruskan pembangunan pesat di Pasir Gudang. Kerajaan negeri juga turut berhasrat untuk melestarikan sektor ekonomi di Pasir Gudang yang berteraskan industri dan pelabuhan selain memelihara alam sekitar selaras dengan Dasar Kelestarian Negeri Johor;

- e. **Kelima**, kerajaan negeri kini turut dalam proses meneliti cadangan Naik Taraf Majlis Daerah Pontian Bertaraf Perbandaran. Usaha ini diharap dapat meningkatkan kualiti perkhidmatan kepada rakyat; dan
- f. **Keenam**, selari dengan Agenda Johor Digital, pendigitalan tadbir urus Kerajaan bakal digiatkan lagi. Inisiatif pendigitalan yang akan dilaksanakan bagi tujuan tersebut adalah:
 - i. Pembangunan Kerangka Analitik Data Raya Johor dengan peruntukan RM5 juta untuk meningkatkan keupayaan mengintegrasikan sumber data daripada agensi-agensi kerajaan lain;
 - ii. Menambah baik infrastruktur Sistem E-Perolehan Kerajaan Negeri dengan peruntukan berjumlah RM5 juta;
 - iii. Program Penggalakan Dan Promosi Perkhidmatan Digital akan dilaksanakan untuk meningkatkan penggunaan aplikasi digital kerajaan secara kerap dan meluas. Program ini diperuntukan sebanyak RM700 ribu;
 - iv. Melaksanakan program Pemantapan Kemahiran Dan Pembangunan Bakat penjawat awam dalam bidang IT dengan peruntukan sebanyak RM700 ribu; dan
 - v. Program Digitalisasi PBT Johor akan dilaksanakan di semua 16 PBT dengan menggunakan Sistem *One Stop Center 3.0 Plus Online*. Sistem ini akan membolehkan kesemua urusan seperti permohonan dan pengulasan pelan pemajuan dibuat secara dalam talian.

166. Program Pengenaan Syarat Tanah "*Fast Track Nil*". Cadangan perlanjutan tempoh *Fastrack Nil* di pentadbiran tanah negeri ini dijangka memanfaatkan 30,858 pemilik tanah untuk membolehkan kadar cukai tanah dikenakan selaras dengan aktiviti di atasnya. Dicapai untuk dilanjutkan pelaksanaannya di bawah Program *Fastrack Nil* 2.0 dan ianya akan dibuka dari 1 Januari 2021 sehingga 31 Mac 2021.
167. Pengecualian dari syarat Kebenaran Merancang (KM) dan caj pemajuan bagi tujuan Pecah Bahagi dan Pecah Sempadan bagi mendapatkan hakmilik individu dengan tujuan bukan pembangunan. Pengecualian dari dikenakan caj pemajuan ini juga terpakai bagi permohonan Pecah Sempadan bagi tujuan pemberian kepada ahli keluarga.
168. Transformasi Syarikat-syarikat Berkaitan Kerajaan (GLC) Negeri akan memasuki fasa pelaksanaan setelah kajian selesai pada tahun ini. Dengan aspirasi sebagai contoh terbaik masa hadapan bagi GLC, inisiatif-inisiatif yang akan dilaksanakan termasuklah memaksimumkan pulangan pelaburan kerajaan dengan menyeimbangkan antara keuntungan dan mandat pembangunan. Setiap GLC yang dikenal pasti akan melalui penstrukturan korporat yang lebih berdaya tahan dan efisien.
169. Seterusnya, bagi meraikan peranan pembangkang yang bersifat konstruktif dan mengangkat martabat institusi wakil rakyat, saya dengan berbesar hati akan meningkatkan peruntukan Yang Berhormat ADUN Pembangkang daripada RM50 ribu kepada RM150 ribu. Selain itu, bagi memberikan lebih pengiktirafan kepada ketua pembangkang, saya mencadangkan elaun beliau dinaikkan daripada RM3 ribu kepada RM5 ribu dan disediakan seorang pembantu tadbir.

Majestic Johor

170. Agenda seterusnya adalah Majestic Johor. Wabak pandemik ini ibarat mimpi ngeri kepada industri pelancongan Johor. Akibat penutupan sempadan negara di samping kelembapan ekonomi global, Sektor Pelancongan adalah yang paling terjejas.
171. Bagi Sektor Pelancongan, kerajaan negeri memperuntukkan sebanyak RM14 juta kepada Tourism Johor.
172. Bagi memacu dan merancakkan semula sektor pelancongan pasca COVID-19, Kerajaan Negeri akan melaksanakan inisiatif seperti berikut:
 - a. **Pertama**, Pelan Induk Pelancongan Johor 2014-2023 akan diteliti semula. Ini bagi memastikan hala tuju sektor pelancongan dapat dirancang dengan lebih tersusun dan mengikut trend semasa;
 - b. **Kedua**, Johor Tourism Interchange (JTI) dengan peruntukkan RM500 ribu akan dibangunkan bagi mentransformasi ekonomi digital pelancongan. JTI akan menghubungkan semua pemilik produk, operator pelancongan serta penggiat industri dalam satu platform *digital marketplace*; dan
 - c. **Ketiga**, Baucar Pelancongan berjumlah RM1.5 juta untuk merancakkan semula segmentasi penginapan serta *shopping and retail* terpilih di Negeri Johor.
173. Seterusnya, kerajaan negeri akan memperuntukkan sebanyak RM5 juta bagi Membangun dan Menaik Taraf Prasarana Pelancongan di Negeri Johor. Prasarana ini merangkumi kemudahan asas pelancongan di daerah, *homestay* dan *desastay* serta Taman Negara. Dengan itu, beberapa infrastruktur pelancongan lain akan dibangunkan dan dibaikpulihan termasuk:
 - a. **Pertama**, RM450 ribu bagi pembinaan infra dan pembangunan Produk Ecotourism di Hutan Taman Negeri Gunung Arong;
 - b. **Kedua**, RM350 ribu untuk pembangunan Pusat Pentadbiran Dan Kemudahan Infrastruktur di Hutan Taman Negeri Ayer Hitam Utara;

- c. **Ketiga**, RM500 ribu bagi Pengurusan dan Pembangunan Trek Pendakian Gunung di Negeri Johor; dan
- d. **Keempat**, RM386 ribu untuk membangunkan Trek Sukan Lasak.

Masyarakat Desa Johor

Yang Berhormat Tuan Speaker,

- 174. Desa Johor dan lingkungannya mempunyai potensi yang mesti dibangunkan. Tidak akan maju Johor ini, jika desa serta masyarakatnya terus tertinggal dan dipinggirkan.
- 175. Kerajaan negeri mesti segera meneroka keberdayaan dan keberhasilan yang boleh ditawarkan oleh Masyarakat Desa Johor.
- 176. Alhamdulillah, melalui kesungguhan dan konsistensi kita terhadap pembangunan luar bandar, ia telah mula membawa kepada pemerkasaan masyarakat desa.
- 177. Buktinya, pada tahun 2019, pendapatan bulanan penengah isi rumah luar bandar Johor adalah sebanyak RM5,352, jauh lebih tinggi berbanding RM3,828 di peringkat nasional dan hanya 21.0% lebih rendah dari kawasan bandar.
- 178. Justeru, pada Belanjawan 2021 kali ini, fokus yang diberikan adalah melalui pemberdayaan ekonomi dan infrastruktur desa, dengan peruntukan keseluruhan berjumlah RM59.2 juta. Jumlah ini merangkumi inisiatif berikut:
 - a. **Pertama**, Projek Bersepadu Pembangunan Ekonomi Kampung (Prospek) yang menekankan pembangunan insitu merangkumi komponen ekonomi, perumahan dan kemudahan asas. Peruntukan adalah RM8 juta untuk jangka masa 5 tahun;
 - b. **Kedua**, kerajaan persekutuan melalui Lembaga Kemajuan Johor Tenggara (KEJORA) telah memperuntukkan sebanyak RM35.2 juta bagi Pembangunan Wilayah Johor Tenggara. Peruntukkan ini adalah untuk pelaksanaan projek-projek pembangunan, termasuklah projek sosioekonomi, keusahawanan, infrastruktur dan pembangunan modal insan.

- c. **Ketiga**, Program Sokongan Pengukuhan Keusahawanan Luar Bandar (SPKLB) untuk memberikan sokongan berbentuk geran penuh kepada usahawan luar bandar;
- d. **Keempat**, Program Pembangunan Usahawan, Produk, Perkhidmatan Dan Pemasaran. Program ini dapat menggalakkan pekebun kecil untuk menceburi bidang lain sebagai sumber pendapatan tambahan melalui keusahawanan. Fokus program ini adalah kepada 4 bidang utama iaitu perkhidmatan, makanan, pembuatan dan pertanian;
- e. **Kelima**, Program Pembangunan Peneroka (PPP) akan dilaksanakan oleh FELDA. Program ini bertujuan untuk mengurangkan kebergantungan warga peneroka terhadap hasil pendapatan tanaman komoditi. Sebaliknya, mereka boleh mempelbagaikan sumber pendapatan sampingan dalam pelbagai bidang;
- f. **Keenam**, Program Penambahbaikan dan Pemerksaan Kampung Tradisi di Iskandar Malaysia (VEEP) yang dilaksanakan oleh IRDA dengan peruntukkan RM 1.5 juta ringgit. Program ini bertujuan untuk memberi pendapatan alternatif isi rumah melalui pelbagai projek sosioekonomi tertumpu;
- g. **Ketujuh**, kerajaan negeri melalui Pihak Berkuasa Tempatan akan melaksanakan Program Pembangunan Kampung Tradisi bagi memberi perkhidmatan sama seperti kawasan taman-taman perumahan lain di Johor;
- h. **Kelapan**, Projek Bekalan Air Luar Bandar (BALB) melalui pembinaan Sistem Retikulasi Negeri Johor dengan peruntukan RM 7 juta ringgit. Projek ini akan membekalkan air boleh diminum pada kuantiti yang mencukupi di daerah Batu Pahat, Kluang, Johor Bahru, Segamat dan Muar;
- i. **Kesembilan**, Projek Bekalan Elektrik Luar Bandar (BELB) akan dilaksanakan dengan peruntukan sebanyak RM7.5 juta. Antara daerah yang terlibat adalah Kulai, Kota Tinggi dan Segamat.

Orang Muda Johor (OMJ)

179. Agenda kesembilan Yang Berhormat Tuan Speaker, adalah Orang Muda Johor atau (OMJ). Di Johor, terdapat lebih daripada 1.5 juta Orang Muda Johor yang berumur antara 14 -39 tahun.
180. Kerajaan negeri akan sentiasa memberikan keutamaan kepada anda. Kita akan sentiasa membela, menyokong dan menyerlahkan bakat-bakat terbaik Orang Muda Johor untuk Malaysia.
181. Oleh itu, melalui agenda ini, Kerajaan Negeri akan memperuntukkan sebanyak RM 57.3 juta untuk inisiatif-inisiatif yang dekat dengan nadi Orang Muda Johor.
182. Dalam kesempatan ini, Kerajaan Negeri Johor merafak sembah dan menjunjung setinggi-tinggi kasih kepada Duli Yang Maha Mulia Sultan Johor atas perkenan melantik Duli Yang Amat Mulia Tunku Mahkota Johor mengetuai dan memimpin semua aktiviti belia di Negeri Johor.
183. Antara inisiatif yang bakal dijalankan adalah penubuhan Tunku Mahkota Ismail Youth Centre (TMIYC). Kerajaan Negeri menyambut baik titah D.Y.A.M. Tunku Mahkota Johor untuk mewujudkan Tunku Mahkota Ismail Youth Centre (TMIYC) di setiap daerah.
184. Tujuan penubuhan TMIYC adalah untuk melahirkan belia Negeri Johor yang berakhlak mulia, bertanggungjawab dan berkebolehan dalam pelbagai aspek kehidupan selain dapat mengasah bakat kepimpinan mereka.

a) Memperkasa Mahasiswa Johor

185. Selain itu, kerajaan negeri akan Memperkasa Mahasiswa Johor dengan melaksanakan inisiatif-inisiatif seperti berikut:
 - a. **Pertama**, Pinjaman Pelajaran Institusi Pengajian Tinggi (IPT) dalam dan luar negara dengan peruntukan RM14.7 juta;
 - b. **Kedua**, Skim Bantuan Pendaftaran dengan peruntukan RM1.5 juta;
 - c. **Ketiga**, Biasiswa Kenangan Dato' Onn sebanyak RM300 ribu;
 - d. **Keempat**, Biasiswa Sultan Ibrahim dengan peruntukan RM300 ribu;

- e. **Kelima**, Dana Didik Johor dengan peruntukan RM100 ribu;
- f. **Keenam**, Tabung Pendidikan Sarjana Permodalan Darul Ta'zim dengan peruntukan RM150 ribu;
- g. **Ketujuh**, Tabung Pendidikan Kakitangan Kumpulan Pelaksana dengan RM30 ribu;
- h. **Kelapan**, Kursus Jangka Pendek guru KAFA dengan jumlah RM50 ribu; dan
- i. **Kesembilan**, bagi Program Pembangunan Mahasiswa Johor, sejumlah RM500 ribu diperuntukkan kepada persatuan-persatuan Mahasiswa Johor di semua Universiti Awam. Selain itu, RM500 ribu juga akan diperuntukkan kepada Duta Mahasiswa Johor.

b) Pelajar Sekolah Johor

- 186. Selain itu, kerajaan negeri cakna dengan perkembangan Pelajar Sekolah Johor, terutama sekali aktiviti *softskills* dan kemahiran berkomunikasi mereka. Justeru itu, sejumlah RM1 juta akan diperuntukkan bagi melaksanakan Program Pembangunan Murid Johor dan Program Penggayaan Bahasa Inggeris.
- 187. Melalui Majlis Agama Islam Negeri Johor pula, kerajaan negeri akan menjalankan inisiatif bantuan pakaian seragam sekolah kepada pelajar fakir dan miskin di Sekolah Kebangsaan, Sekolah Menengah dan Sekolah Agama Kerajaan Negeri Johor.
- 188. Bantuan yuran sekolah kepada pelajar miskin Sekolah Agama dan bantuan yuran pendaftaran di IPT dalam negara juga akan diberikan. Kesemua inisiatif ini berjumlah RM8.3 juta.
- 189. Tambahan lagi, Kerajaan Negeri amat menitik berat kepada pelajar-pelajar yang akan mengambil peperiksaan SPM pada tahun 2021. Konteks semasa menjejaskan persiapan peperiksaan bagi ramai pelajar-pelajar sekolah.
- 190. Untuk itu, Kerajaan Negeri melalui Yayasan Pelajaran Johor dan Jabatan Pendidikan Negeri Johor akan mengadakan tuisyen secara percuma bagi 6 subjek kepada pelajar-pelajar Tingkatan 5 dari keluarga B40.

191. Seramai 31,478 orang akan menerima manfaatnya dengan kos sebanyak RM4.5 juta. Dengan program tuisyen secara percuma ini, diharapkan pelajar-pelajar akan lebih bersedia dan akan mendapat keputusan yang cemerlang.

c) Kesukarelawanan dan Kepimpinan

192. Seterusnya, bagi menggalakkan penglibatan belia dalam aktiviti berkaitan Kesukarelawanan dan Kepimpinan, kerajaan negeri telah menyusun beberapa inisiatif untuk tujuan tersebut, iaitu:
- a. Southern Volunteers yang meliputi 10 ribu penyertaan belia untuk aktiviti kesukarelawanan;
 - b. Program Kepimpinan untuk melatih pemimpin muda Negeri Johor setaraf dengan pemimpin muda di peringkat global melalui Dewan Muda Johor; dan
 - c. Hikmah Johor sebagai platform kepada bekas-bekas pemimpin dan tokoh Negeri Johor berkongsi pengalaman, idea dan pemikiran buat golongan belia.
 - d. Menaiktaraf dan menjenamakan semula Institut Integriti Kepimpinan dan Latihan Semangat Dato' Onn (IKLAS) kepada Institut Dato' Onn sebagai sebuah agensi yang menyelaras program pembangunan belia meliputi persidangan dan latihan kepimpinan; platform tokoh dan pemimpin muda Johor; menyelaras maklumat belia Johor.
193. Selain itu, Kerajaan Negeri juga akan memberikan Dana Galakan Persatuan Belia Negeri Johor bagi melaksanakan pelbagai program meliputi aktiviti kesukarelawanan, khidmat bakti masyarakat, belia, sukan dan rekreasi.

d) Ekonomi Belia

194. Selain daripada fokus-fokus di atas, agenda khusus kepada Orang Muda Johor akan turut diberikan dalam lingkungan Ekonomi Belia. Antara program-program yang akan dilaksanakan ialah Projek Pembangunan Belia Tani FELDA dan Agropreneur Muda Johor.

e) Sukan dan Gaya Hidup Sihat

195. Seterusnya, Kerajaan Negeri menerusi KPRJ akan menjalankan inisiatif-inisiatif berikut dengan kos **RM1 juta**.
- a. **Pertama**, membangunkan *Johor Sports Masterplan 2030*. Pelan induk ini akan memberikan hala tuju baharu kepada industri sukan Negeri Johor; dan
 - b. **Kedua**, kolaborasi bersama Loughborough University dari United Kingdom dalam bidang sains sukan bagi melahirkan atlet bertaraf dunia serta memacu pembangunan "*sports tourism*".
196. Tambahan lagi, Kerajaan Negeri akan memperuntukkan sebanyak RM1.1 juta kepada MSNJ bagi memperkasa Persatuan-Persatuan Sukan di Negeri Johor.
197. Sebanyak RM600 ribu akan diberikan dalam bentuk geran kepada Persatuan Sukan Negeri Johor mengikut gred dan RM510 ribu kepada Program Profesionalisasi Persatuan Sukan Negeri Johor.
198. Berikutnya, program XTIF JOHOR akan diwujudkan dengan peruntukkan sebanyak RM1.98 juta bagi merakyat dan menggalakkan aktiviti sukan sebagai gaya hidup rakyat Johor.
- a. **Pertama**, Program Sukan Makmur XTIF JOHOR akan dilaksanakan di 56 kawasan Dewan Undangan Negeri (DUN) Negeri Johor; dan
 - b. **Kedua**, acara seperti XTIF JOHOR *Fun Ride*, *Fun Run* dan *E-Sports* juga akan dilaksanakan dibawah JOYDEC.
199. Selain itu, selaras dengan Agenda Johor Digital, satu pangkalan data belia Johor atau *Johor Youth Database* akan diwujudkan dengan peruntukan RM500 ribu. Pengkalan data ini akan membekalkan maklumat komprehensif berkenaan belia kepada pembuat dasar negeri.
200. Pada kesempatan ini, saya ingin merakamkan setinggi-tinggi ucapan tahniah kepada pasukan bola sepak Johor Darul Ta'zim (JDT) yang diterajui oleh Duli Yang Amat Mulia Tunku Mahkota Johor yang telah mengekalkan kejuaraan Liga Super musim ketujuh berturut-turut baru-baru ini.

201. Sesungguhnya kejayaan ini akan menjadi sumber inspirasi kepada negeri untuk terus membangunkan industri sukan di Negeri Johor.
202. Kerajaan negeri menyambut baik cadangan yang dilontarkan oleh D.Y.A.M. Tunku Mahkota Johor untuk memastikan rakyat terutamanya golongan belia dapat melakukan aktiviti yang sihat dan menggunakan fasiliti gimnasium dengan kadar yang berpatutan.
203. Sehubungan itu, kerajaan negeri berhasrat untuk membangunkan sebuah Gimnasium Rakyat bertaraf antarabangsa di Johor Bahru. Gimnasium Rakyat ini dapat dimanfaatkan oleh setiap lapisan masyarakat terutama golongan belia, berupaya untuk melakukan aktiviti sihat.
204. Diharapkan agar inisiatif-inisiatif di atas dapat menyokong, dan memberdaya belia kita, di samping berupaya mengembalikan semula kebanggaan Orang Muda Johor terhadap Negeri Johor Darul Ta'zim.

Johor Madani

205. Agenda seterusnya adalah Agenda Johor Madani. Johor haruslah menjadi negeri yang mengekalkan adat dan budayanya. Meskipun kita sibuk mengejar arus kemodenan, adat dan budaya rakyat Johor tidak akan dilupakan.
206. Dalam konteks semasa, pandemik COVID-19 menuntut kita untuk memberi fokus kepada daya tahan ekonomi. Namun, yang sering ditinggal-tinggalkan adalah daya tahan sosial dan daya tahan identiti. Malah, aspek kelestarian alam juga mungkin dianggap sampingan pada waktu ini.
207. Pada hari ini juga, saya ingin memperkenalkan konsep **Johor Madani**. Di dalam Johor Madani ini, telah dirangkumkan aspek-aspek berikut:
- a. Pemerkasaan Syiar Islam;
 - b. Perpaduan Kaum dan Komuniti;
 - c. Pemeliharaan Budaya, Kesenian dan Warisan Johor; dan
 - d. Kelestarian Alam dan Kesihatan.
208. Ini kerana, aspek-aspek di atas adalah tunjang kepada peradaban, iaitu kata asas bagi 'madani'. Maka, Johor Madani adalah Johor yang Makmur dan Sejahtera sifatnya. Seimbang dan moderat tatakelolanya.

a) Pemerkasaan Syiar Islam

209. Oleh itu, bagi aspek **Pemerkasaan Syiar Islam, Kerajaan Negeri telah memperuntukkan** RM113.7 juta bagi inisiatif-inisiatif berikut:
- a. Pertama - Kerajaan Negeri akan membina 12 buah Sekolah Agama Fasa 6 bagi tempoh 5 tahun akan datang, dengan anggaran peruntukan berjumlah RM85 juta. Pembinaan baharu sekolah ini dapat menyediakan sebanyak 12 ribu tempat belajar bagi anak-anak Islam di Johor;
 - b. Kedua - Membaik pulih dan menyelenggara masjid-masjid Kerajaan dan kariah serta Projek Pembangunan Perkuburan Bersepadu dengan peruntukan keseluruhan sebanyak RM7.4 juta;

- c. Ketiga - Peruntukan sebanyak RM9 juta bagi membaik pulih dan penambahbaikan infrastruktur Sekolah Agama Johor dan Sekolah Agama Bantuan Kerajaan sedia ada;
 - d. Keempat - Menubuhkan Briged Ahli Sunnah Wal Jamaah (ASWAJA). Briged ini akan menggalakkan belia Islam menceburkan diri dalam aktiviti kesukarelawanan masjid dan surau di Johor dengan peruntukan sebanyak RM300 ribu. Dianggarkan seramai 500 orang belia berumur antara 15 hingga 30 tahun akan terlibat dalam briged ini.
210. Selain itu, Kerajaan Negeri melalui Kumpulan Prasarana Rakyat Johor (KPRJ) akan menaik taraf 10 buah Sekolah Agama Kebangsaan Johor (SAKJ) kepada Sekolah Bestari dengan peruntukan RM1.5 juta dalam tempoh 3 tahun.
211. Tambahan lagi, Kerajaan Negeri menerusi Majlis Halal Negeri Johor akan memperkasakan peranannya di dalam merangka strategi untuk menjadikan Negeri Johor sebagai Hab Halal Global. Antara inisiatif yang akan dilaksanakan adalah:
- a. **Pertama**, MAINJ akan meningkatkan kapasiti *Johor Toyyiban Laboratories* (JTLAB) sebagai sebuah pusat analisis dan penyelidikan komersial yang diiktiraf dunia.
 - b. **Kedua**, bagi menyokong pengusaha-pengusaha Perusahaan Kecil dan Sederhana, kerajaan negeri akan bekerjasama dengan PIJ Holdings bagi penyediaan Geran Pembiayaan sebanyak RM500 ribu bagi mendapatkan bimbingan permohonan sijil halal.

b) Perpaduan Kaum dan Komuniti

212. Perpaduan merupakan ramuan yang penting bagi kemakmuran sebuah negeri. Tanpa perpaduan, tiadalah keamanan dan ketenteraman. Dan antara pasak utama kepada perpaduan, adalah penglibatan semua komuniti dalam pelbagai aktiviti kemasyarakatan.
213. Dalam arus kemodenan, masyarakat Johor tidak harus bersifat individualistik. Sifat ini, jika ia keterlaluan, akan mencambahkan prejudis dan syak wasangka antara kita.

214. Seperti yang saya katakan di awal ucapan saya, *we are all Johoreans!*
215. Selaras dengan semangat itu, beberapa inisiatif yang bakal diambil Kerajaan Negeri, dengan peruntukan keseluruhan sebanyak RM4.2 juta. Antaranya adalah:
- a. **Pertama**, berasaskan Dasar Komuniti Negara (DKN), Kerajaan Negeri bersetuju untuk memperuntukkan sebanyak RM1.5 juta kepada Program Pembangunan Komuniti dan Penambahbaikan Pengurusan Projek Perumahan Rakyat (PPR) dan Rumah Sewa Kerajaan (RSK);
 - b. **Kedua**, bagi memperkasakan peranan komuniti dalam aspek pembangunan sosioekonomi, satu kajian penglibatan komuniti akan dilaksanakan di setiap PBT negeri Johor dengan peruntukan sebanyak RM1 juta;
 - c. **Ketiga**, program kebersamaan dan integrasi kaum akan dilaksanakan dengan kerjasama Jabatan Perpaduan Negara dan Integrasi Nasional Negeri Johor dengan peruntukan sejumlah RM1 juta;
 - d. **Keempat**, sebanyak RM700 ribu diperuntukkan bagi melaksanakan inisiatif memperkasa tanggungjawab Komuniti Rukun Tetangga (KRT) melalui Program Rondaan Bersepadu Keselamatan Kejiranan dan Program 1 Polis 1 KRT; dan
 - e. **Kelima**, satu Jawatankuasa *Taskforce* Masyarakat India akan diwujudkan bagi meneliti dan menyelesaikan isu-isu tertanggung kaum India.

c) Pemeliharaan Budaya, Kesenian dan Warisan Johor

216. Dalam aspek **Pemeliharaan Budaya, Kesenian dan Warisan**, Kerajaan Negeri dengan kerjasama Yayasan Warisan Johor (YWJ), Majlis Kebudayaan Negeri Johor, Jabatan Kebudayaan dan Kesenian Negara (JKKN) Johor dan PBT bakal melaksanakan beberapa inisiatif dengan peruntukan sebanyak RM3.1 juta seperti berikut:
- a. **Pertama** - Lestari Seni Budaya yang bertujuan melahirkan lebih ramai pelapis dalam pelbagai cabang seni di peringkat akar umbi;

- b. **Kedua** - Mewujudkan Pustaka Warisan Digital untuk menyebarkan produk dan tarikan kebudayaan warisan Negeri Johor selari dengan Agenda Johor Digital;
 - c. **Ketiga** - Memperkukuh warisan bahasa dan persuratan Melayu bagi menghargai karya-karya sastera, selain daripada mengasah bakat generasi muda dalam bidang penulisan; dan
 - d. **Keempat** - Program mempromosikan makanan Johor di peringkat tempatan dan antarabangsa dengan insentif dan skim penggalakan kepada semua usahawan bagi menceburi perniagaan makanan Johor.
217. Bagi menonjolkan identiti negeri melalui seni bina dan fasad bangunan warisan, Pelan Pembangunan Bandar Warisan Johor akan dilaksanakan oleh PBT.

Yang Berhormat Tuan Speaker,

d) Kelestarian Alam Sekitar dan Kesihatan

218. Dari aspek **Kelestarian Alam Sekitar dan Kesihatan** pula, kerajaan negeri akan menjalankan inisiatif-inisiatif seperti berikut.

a) Kesihatan

219. Sudah hampir setahun rakyat Malaysia hidup dalam norma baharu, melalui prosedur-prosedur yang dikeluarkan oleh Majlis Keselamatan Negara. Namun begitu, saban hari, masih ramai lagi yang dikompaun kerana enggan mematuhi SOP norma baharu yang ada.
220. Pada masa yang sama, gejala penagihan dadah semakin berleluasa, tatkala segala tumpuan diberikan untuk memerangi pandemik COVID-19.
221. Atas sebab itu, kerajaan negeri akan menganjurkan Program Kesedaran Kesihatan Norma Baharu dengan kerjasama Kementerian Kesihatan Malaysia dan Program Pemerkasaan Komuniti oleh Agensi Anti Dadah Kebangsaan (AADK) akan dipromosikan dengan peruntukan sejumlah RM1.1 juta.

b) Kelestarian Alam Sekitar

222. Dari sudut Kelestarian Alam Sekitar pula, Kerajaan Negeri mengakui kepentingan sungai sebagai khazanah alam yang tidak terperi nilainya. Atas kesedaran itu, sejumlah RM3.53 juta diperuntukkan untuk program kelestarian sungai-sungai di Johor yang merangkumi:
- a. Program 1 Daerah 1 Sungai (1D1S) dengan peruntukan RM2 juta untuk memberikan kesedaran kepada komuniti setempat berkenaan kepentingan sungai;
 - b. Program Pemulihan Sungai Kim Kim dengan peruntukan RM500 ribu. Program ini adalah dengan kerjasama empat universiti, iaitu Universiti Teknologi Malaysia (UTM), Universiti Tun Hussein Onn Malaysia (UTHM), Universiti Sains Islam Malaysia (USIM) dan Universiti Teknikal Malaysia Melaka (UTeM).
223. Bagi menjamin kelestarian Sungai Skudai dan Sungai Tebrau, yang merupakan sungai utama dalam sistem pengairan Johor Bahru, sebanyak RM1 juta diperuntukkan dengan kerjasama Jabatan Pengairan dan Saliran.
224. Dalam aspek penguatkuasaan pula, Jabatan Alam Sekitar dengan kerjasama jabatan dan agensi Kerajaan Negeri akan melaksanakan Program Penguatkuasaan Bersepadu. Program penguatkuasaan ini akan dijalankan ke atas industri atau premis yang menyumbang kepada pencemaran alam sekitar.
225. Selanjutnya, kerajaan negeri juga akan memutuskan inisiatif pemasangan Stesen Pemantauan Kualiti Udara (PM10 dan PM2.5). Untuk fasa pertama bagi tahun hadapan, stesen ini akan dipasang di tiga (3) PBT bertaraf bandaraya. Stesen pemantauan kualiti udara ini mampu memastikan pengawasan kualiti udara secara menyeluruh dan sistematik di kawasan PBT.
226. Kerajaan negeri juga akan membangunkan Pusat Pengurusan Sisa Pepejal Terjadual Bersepadu bagi menangani masalah pencemaran sisa kimia dan bahan buangan terjadual yang berpunca daripada pelupusan secara haram.

227. Dalam kesempatan ini, kerajaan negeri ingin merakamkan jutaan terima kasih kepada Kerajaan Persekutuan atas peruntukan sebanyak RM10 juta untuk usaha memelihara dan memulihara ekosistem persisiran pantai dan habitatnya di Johor.

c) Penjagaan Ekosistem Flora dan Fauna

228. Kerajaan negeri sentiasa menekankan kepentingan penjagaan ekosistem flora dan fauna di Johor. Oleh itu, kerajaan negeri melalui agensi-agensi berkaitan akan menjalankan inisiatif seperti berikut:
- a. **Pertama**, sebanyak RM7 juta diperuntukkan untuk meneruskan Projek Santuari Gajah (JES) Fasa II dengan kerjasama Jabatan Perhilitan Johor;
 - b. **Kedua**, sebanyak RM850 ribu diperuntukkan untuk aktiviti pemulihan biodiversiti dan ekopelancongan seperti;
 - a) Program pengurusan habitat gajah;
 - b) Program “*Junior Park Ranger*” bersama pihak sekolah;
 - c) Program penguatkuasaan “*Eco Ranger*” bersama pihak komuniti;
 - d) Program komuniti “*One Family Tree Nursery*”;
 - e) Program Sifar Sampah; dan
 - f) Pemantauan kawasan pencerobohan di Taman Negara Johor Gunung Ledang bersama komuniti setempat.
229. Seterusnya, kerajaan negeri melalui Jabatan Perhutanan Johor akan menyediakan Pelan Induk Pembangunan *Panti Conservation Area* (PCA) dan Pembangunan Sistem Pengurusan, Pemantauan dan Penguatkuasaan Hutan Simpanan Kekal. Sejumlah RM500 ribu diperuntukkan untuk tujuan ini.
230. Bagi meneruskan program Kelestarian Alam Sekitar secara lebih menyeluruh, kerajaan negeri akan melancarkan inisiatif Program Infaq Bumi Hijau Johor dengan kerjasama Waqaf An-Nur. Program ini melibatkan penanaman 100 ribu pokok di seluruh Johor dengan peruntukan berjumlah RM700 ribu.

231. Kerajaan negeri juga bekerjasama dengan IRDA, PBT dan Jabatan Pendidikan Negeri Johor bagi pelaksanaan inisiatif-inisiatif meningkatkan kesedaran amalan rendah karbon. Antaranya:
- a. **Pertama**, Pusat Eko di Perpustakaan Sultan Ismail dengan peruntukan sebanyak RM2.5 juta daripada *Japan International Cooperation Agency* (JICA);
 - b. **Kedua**, Pelan Induk Masyarakat Rendah Karbon Iskandar Malaysia 2030 dengan peruntukan RM3 juta daripada Kerajaan Persekutuan menerusi IRDA;
 - c. **Ketiga**, Inisiatif *Solar Supply Agreement Of Renewable Energy* (SARE) di semua bangunan PBT di bawah program masyarakat rendah karbon; dan
 - d. **Keempat**, Inisiatif Program Penyelesaian Sisa Pintar di Majlis Perbandaran Pengerang dengan peruntukan RM3.2 juta untuk pengurusan sisa pepejal yang lebih sistematik dan bersih.

Johor Prihatin

Yang Berhormat Tuan Speaker,

232. **Agenda kesebelas adalah Agenda Johor Prihatin.** Kerajaan Negeri sentiasa peka dengan keperluan dan kesejahteraan golongan rentan, kanak-kanak, wanita, warga emas, orang kelainan upaya (OKU) dan Orang Asli di Johor.
233. Golongan ini bukan sahaja perlu dibantu. Mereka perlu juga diberdayakan dengan intervensi-intervensi yang sesuai dan berkesan.
234. Oleh itu, dalam Belanjawan Johor 2021 ini, kerajaan negeri telah menggariskan beberapa inisiatif-inisiatif penting dengan peruntukan keseluruhan sebanyak RM2.3 juta, seperti berikut:
235. Bagi ibu-ibu tunggal dan golongan yang berpendapatan rendah, kerajaan negeri akan memperluaskan *Centre of Suri Johor*. Ia berfungsi sebagai satu platform pemasaran produk mereka dengan lebih luas. Program ini bermatlamat melahirkan 700 orang usahawan wanita dengan peruntukan berjumlah RM1 juta.
236. Selain itu, tiga program sokongan memfokuskan kepada wanita Johor akan dilaksanakan menerusi inisiatif di bawah:
- a. **Pertama**, Women Income Generating Skills Projects (WINGS) 2021;
 - b. **Kedua**, Skim Bantuan Peralatan Perniagaan (SKIPP) 2021;
 - c. **Ketiga**, Kursus Inspirasi Usahawan Berfokus (KIUB).
237. Baru-baru ini, Dr. Masliza Mahmod, anak kelahiran Batu Pahat, menjadi wanita pertama Johor yang dinaikkan pangkat sebagai Profesor Madya perubatan kardiovaskular di Universiti Oxford, United Kingdom.
238. Dengan itu, inisiatif penggalakan yang dinamakan Pesona Wanita Profesional bakal diperkenalkan. Inisiatif ini bertindak sebagai satu platform pengiktirafan, dan juga untuk memanfaatkan kepakaran golongan wanita terpilih dalam pelbagai bidang profesional.

239. Lebih-lebih lagi wanita seperti Dr. Masliza Mahmod. Kerajaan Negeri berharap, lebih ramai lagi bakat wanita Johor yang bakal diketengahkan sebagai sumber inspirasi masyarakat umum. Bak kata Dr. Masliza, *the sky is the limit*. Itu lah semangat yang patut ada pada wanita Johor.
240. Atas sebab di atas, dan untuk terus memperkasa peranan wanita dalam pembangunan ekonomi dan sosial, satu kajian Pembangunan Data Wanita Dan Keluarga Negeri Johor akan dilaksanakan bagi memastikan bantuan diberikan secara bersasar dan efektif.
241. Kerajaan Negeri turut mengambil perhatian terhadap pengukuhan institusi kekeluargaan. Oleh itu, Program Intervensi Keluarga dan Komuniti serta keprihatinan terhadap Warga Emas akan dilaksanakan, dengan peruntukan sebanyak RM750 ribu melalui program-program berikut:
- a. **Pertama**, *Program I-Cons Of Sakinah*;
 - b. **Kedua**, Program Kembara Keluarga Sejahtera Johor 2021;
 - c. **Ketiga**, *Johor Support Programme For Community (SPARK)*;
 - d. **Keempat**, Warga Emas Care (WE CARE); dan
 - e. **Kelima**, *Massive Open Online Course (MOOC)* Bagi Modul Keluarga Sakinah Dan Modul Keluarga Sejahtera.
242. Bagi meningkatkan produktiviti dan pendapatan masyarakat Orang Asli Johor pula, Kerajaan Negeri akan menjalankan Program Pembangunan Ekonomi dan Usahawan Orang Asli dengan peruntukan berjumlah RM300 ribu.
243. Kanak-kanak adalah aset masa depan yang perlu dilindungi oleh semua pihak. Justeru, Kerajaan Negeri bercadang agar Program Advokasi Pencegahan dan Perlindungan Kanak-Kanak diperluaskan. Program ini dapat memberikan kefahaman kepada ramai berkaitan tanggungjawab dalam melindungi kanak-kanak daripada bahaya penderaan.
244. Sementara itu, bagi menggalakkan aktiviti-aktiviti kesukarelawanan, kerajaan negeri memperuntukkan RM200 ribu bagi Naik Taraf Bangunan Vounteers Activity Centre (V@C) di Batu Pahat.

245. Pusat ini akan menjadi tempat kepada sukarelawan Jabatan Kebajikan Masyarakat yang berdaftar, bagi mengadakan perjumpaan, membuat perancangan, penyusunan dan gerak aktiviti kesukarelawan mereka.
246. Seterusnya, Orang Kelainan Upaya (OKU) adalah sebahagian daripada golongan rentan yang wajar dibantu dan diberi perhatian. Dengan itu, Kerajaan Negeri memperuntukkan sejumlah RM250 ribu bagi melaksanakan beberapa program. Antaranya:
- a. Program Latihan dan Promosi (PLP) khususnya untuk meningkat dan menambah nilai kemahiran sedia ada golongan OKU dengan peruntukan RM150 ribu; dan
 - b. Program Kesedaran kepada Keluarga yang Mempunyai Anak-anak OKU (KOKU) dengan peruntukan RM100 ribu.

Johor Berkebakikan

247. Agenda terakhir adalah agenda Johor Berkebakikan. Agenda ini akan memberi kelegaan langsung kepada rakyat Johor. Kelegaan, dalam mengharungi kehidupan khususnya dalam krisis COVID-19.
248. Ia adalah satu intervensi dan bantuan segera kepada golongan yang begitu terkesan dengan keadaan ekonomi semasa. Sudah pasti, intervensi dan bantuan ini bukanlah yang terakhir, dan akan diperbaharui pada masa akan datang.
249. Agenda yang akan dilaksanakan adalah:
- a. **Pertama**, pemberian wang tunai *one-off* sebanyak RM300 ringgit selama dua bulan kepada 26,626 penerima dari senarai e-Kasih Jabatan Kebajikan Masyarakat (JKM). Jumlah peruntukan adalah RM15.98 juta;
 - b. **Kedua**, pemberian wang tunai *one-off* sebanyak RM500 ringgit kepada 47,159 penyewa premis, pasar awam, peniaga pasar malam dan peniaga pasar tani yang berdaftar dengan Pihak Berkuasa Tempatan (PBT) seluruh Johor. Jumlah peruntukan adalah RM 23.58 juta;
 - c. **Ketiga**, pemberian wang tunai *one-off* sebanyak RM500 ringgit kepada 5,205 pemilik teksi, teksi limosin dan teksi lapangan terbang. Jumlah peruntukan adalah RM2.60 juta;
 - d. **Keempat**, pemberian wang tunai *one-off* sebanyak RM150 ringgit kepada 35,000 Mahasiswa Anak Johor daripada keluarga B40. Jumlah peruntukan adalah RM5.2 juta. Duit ini, nak beli data internet pun boleh;
 - e. **Kelima**, pemberian wang tunai *one-off* sebanyak RM500 ringgit kepada 2,071 pengusaha bas sekolah berdaftar. Jumlah peruntukan adalah RM1 juta;
 - f. **Keenam**, pemberian insentif bantuan *one-off* sebanyak RM100 kepada 20,000 pemandu dan penghantar makanan syarikat *e-hailing* yang berdaftar di Johor. Jumlah peruntukan adalah RM2 juta; dan

- g. **Ketujuh**, pemberian wang tunai *one-off* sebanyak RM100 kepada setiap orang pelajar sekolah rendah dan menengah yang berasal dari keluarga berpendapatan RM3,000 hingga RM7,000 sebulan. Jika sebuah keluarga mempunyai anak seramai lima orang, dan bersekolah di peringkat rendah mahupun menengah, mereka akan menerima RM500. Inisiatif ini akan melibatkan peruntukan sebanyak RM18.94 juta dan memberi manfaat kepada 189,389 pelajar. Ianya merupakan pelengkap kepada bantuan yang diberikan oleh kerajaan persekutuan kepada pendapatan isi rumah di bawah RM3000 sebulan.
250. Bagi menghargai jasa dan pengorbanan *frontliners*, kerajaan negeri akan menyalurkan bantuan tunai secara *one off* sebanyak RM200 kepada 30 ribu petugas dengan jumlah peruntukan RM6 juta.
251. Bukan itu sahaja. Ada banyak perkhabaran-perkhabaran baik yang lain. Belum habis lagi. Antaranya:
252. Bantuan Am Negeri akan dinaikan dari RM200 ke RM 300 sebulan kepada seramai 5,700 penerima di bawah bantuan Jabatan Kebajikan Masyarakat Negeri Johor.
253. Selain itu, Majlis Agama Islam Negeri Johor (MAINJ) akan turut berperanan dalam agenda Johor Berkebajikan dengan peruntukan keseluruhannya sebanyak RM152.1 juta. Antaranya melalui:
- a. Bantuan Sara Hidup Bulanan bagi golongan berpendapatan rendah;
 - b. Bantuan Perubatan Rawatan Hemodialisis kepada pesakit buah pinggang;
 - c. Bantuan Perumahan kepada pemilik rumah uzur sama ada dalam bentuk bina baru atau baik pulih; dan
 - d. Bantuan Rumah Kebajikan bagi kanak-kanak menghidap autisme.
254. Pada masa yang sama, MAINJ mengambil inisiatif tambahan untuk membantu asnaf iaitu penerima Bantuan Sara Hidup bulanan dan bantuan perubatan bulanan dengan sumbangan tambahan *one-off* RM100 seorang. Seramai 20,507 asnaf akan menerima manfaat tersebut serta tunai akan di kreditkan terus ke akaun pada Januari 2021 dengan jumlah peruntukan RM2.05 juta.

255. Berikutan keluhan dari masyarakat yang terjejas akibat pandemik COVID-19, MAINJ akan manyalurkan sumbangan tunai sebanyak RM 200 kepada 17,000 individu. Peruntukan yang disediakan adalah sebanyak RM 3.4 juta ringgit. Permohonan akan dibuka secara dalam talian pada 1 hingga 14 Disember 2020.
256. Tambahan lagi, seramai 10 ribu orang pesakit akan diberikan Bantuan Perjalanan kepada Pesakit Kronik yang berdaftar di bawah Skim Bantuan Am Negeri dan Jabatan Kebajikan Masyarakat Negeri Johor dengan peningkatan dari RM 20 ringgit ke RM 50 ringgit.
257. Kerajaan Negeri akan terus memperkasakan golongan yang memerlukan bantuan. Justeru, program COMB (Cari Orang Memerlukan Bantuan) akan dilaksanakan dengan tumpuan kepada masyarakat bandar, luar bandar, FELDA, ladang dan kawasan pedalaman di Negeri Johor.
258. Dalam usaha meringankan kesusahan masyarakat yang memerlukan, Kerajaan Negeri akan melaksanakan inisiatif Bantuan Bank Makanan kepada golongan miskin bandar dengan jumlah peruntukan sebanyak RM 11 juta ringgit.
259. Pada masa yang sama, Skim Pemberian Air Percuma sebanyak 10 meter padu kepada golongan B40 Negeri Johor akan diteruskan. Ini program Kerajaan yang lalu, yang kita rasakan satu perkara baik dan akan diteruskan. Seramai 200 ribu isi rumah dianggarkan menerima manfaat dari skim ini.
260. Bagi penggiat Industri Pelancongan pula, mereka akan menerima insentif dengan jumlah sebanyak RM5 juta, seperti berikut:
- Pertama**, pemberian insentif *one-off* RM1 ribu kepada pemandu pelancong yang berdaftar di Negeri Johor;
 - Kedua**, pemberian bantuan insentif *one-off* kepada 16 persatuan pelancongan negeri dan daerah dengan peruntukan sebanyak RM320 ribu;
 - Ketiga**, pemberian insentif *one-off* RM2 ribu kepada 586 syarikat agensi pelancongan;
 - Keempat**, pengecualian pembayaran duti hiburan bagi taman-taman tema dan pusat hiburan keluarga; dan

- e. **Kelima**, pengecualian Pembayaran Lesen Perniagaan kepada 1,031 buah syarikat berkaitan pelancongan.
261. Atas dasar keterangkuman dan nilai muhibah masyarakat berbilang kaum, Kerajaan Negeri akan memberikan peruntukan khusus kepada masyarakat Cina dan India bagi tujuan kebajikan, aktiviti keusahawanan dan pendidikan komuniti masing-masing. Peruntukan akan diberikan kepada yayasan-yayasan berikut:
- a. Yayasan Sultanah Fatimah - RM 6 juta ringgit
 - b. Yayasan Sultanah Rogayah - RM 4 juta ringgit
262. Selain itu, Kerajaan Negeri akan meneruskan penganjuran Jualan Makmur Johor agar rakyat Johor dapat membeli barang-barang keperluan pada harga yang lebih rendah. Inisiatif ini melibatkan peruntukan sebanyak RM 500 ribu ringgit. Pada masa hadapan, penganjuran Jualan Makmur Johor akan diperluas mengikut keperluan dan kapasiti.
263. Kepada Penjawat Awam Negeri Johor yang menjadi tulang belakang kepada kelancaran pentadbiran, Kerajaan Negeri bersetuju untuk memberikan Bantuan Khas Kewangan Tahun 2020 kepada Kakitangan Kerajaan Negeri Johor dan Kakitangan Awam Persekutuan yang dibayar gaji oleh Kerajaan Negeri Johor sebanyak setengah bulan gaji atau minimum RM1 ribu. Bantuan Khas Kewangan ini akan dibayar sebelum akhir tahun 2020.
264. Bantuan Khas Kewangan ini juga akan dipanjangkan kepada semua Guru KAFA, Petugas Pusat Pemulihan Dalam Komuniti (PDK) dan Guru Tadika Islam Johor (TAJ).

Penutup

Yang Berhormat Tuan Speker,

266. Saya ingin menegaskan yang segala peruntukan, inisiatif dan rangsangan yang telah dibentangkan ini, hanyalah sebahagian besar daripada keseluruhan rencana, peruntukan dan imbuhan yang akan dilaksanakan pada tahun hadapan.
267. Yang pasti, saya ingin menegaskan bahawa, kesemua 12 Agenda Kebajikan, Keberdayaan, dan Keberhasilan yang membentuk Belanjawan 2021 ini, telah disusun dengan meletakkan kepentingan rakyat dan ekonomi Johor di tangga teratas.
268. Tiadalah keutamaan lain kepada kami, kecuali keutamaan semua lapisan rakyat yang benar-benar terhimpit pada waktu ini.
269. Kita mahu memastikan yang pembentangan Belanjawan 2021 ini bukan sekadar agenda akhir tahun 2020, tetapi menjadi titik mula paling penting untuk Johor bangkit semula pada tahun 2021, insyaAllah.
270. Kepada seluruh jentera Kerajaan Johor, saya mengambil kesempatan ini, dengan rasa sangat bertanggungjawab, untuk mengingatkan diri saya dan semua, bahawa di bahu kitalah terletakinya kejayaan, keberkesanan dan manfaat daripada Belanjawan 2021 ini.
271. Kitalah yang akan menentukan kebajikan rakyat terbela, perniagaan dibantu dan ekonomi dipulihkan. Kita adalah katalis terpenting untuk kejayaan Belanjawan 2021 ini.
272. Maka saya menyeru agar kita semua mengambil tanggungjawab ini secara penuh seluruh. Menjiwainya, melaksanakan ia dengan sebaik-baiknya, beramanah dalam berbelanja, dan menyegerakan segala pelaksanaan Belanjawan 2021 ini.
273. Janganlah nanti Belanjawan ini hanya jadi rencana tanpa kerja nyata. Ia menjadi Belanjawan yang impaknya berganda jika kita efisien, amanah dan bersegera dalam tindakan dan perbuatan kita.
274. Justeru, saya menyeru dengan sedalam-dalam keikhlasan hati saya, untuk kita segera jayakan Belanjawan ini, kerana rakyat benar-benar mendambakan bantuan dan rangsangan untuk terus hidup.

275. Akhirnya, semoga Belanjawan 2021 ini merupakan perkhabaran yang melapangkan hati-hati rakyat di luar sana. Agar mereka dengan sebaik mungkin berdaya tahan, dalam waktu sebegini getir.
276. Ingatlah, sedikit masa lagi, akan terbitlah terang dan kecerahan. Hujan panas permainan hari, susah senang permainan hidup. Semua ini adalah adat kehidupan.
277. Seruan saya, marilah kita bekerja keras menggugahkan semula Johor ini, dengan kehidupan yang membaik, perniagaan yang bertumbuh, ekonomi yang berdaya saing serta kemakmuran dan kesejahteraan yang teragih adil dan berpanjangan!
278. Marilah kita bina semua Johor seperti sebelum pandemik ini. Johor yang senantiasa rancak dengan pelbagai rencana, dengan pelbagai cerita dan pelbagai ragam “peel Johornya”. Sungguh, kita sangat merindui Johor yang seakan itu.
279. Saya harap segala niat murni dan usaha keras ini akan dapat dilaksanakan dan dijayakan dengan sebaiknya. Khususnya dengan sokongan dan komitmen tidak berbelah bahagi semua Ahli Yang Berhormat di dalam Dewan Yang Mulia ini, dan para Penjawat Awam Johor yang lain.

Yang Berhormat Tuan Speaker,

Kepada Allah kita berserah.

Dengan lafaz Bismillahirrahmanirrahim, saya mohon mencadangkan.

Sekian, Wabillahi taufik wal hidayah,

Assalamualaikum warahmatullahi wabarakatuh dan salam sejahtera.

***DISEDIAKAN OLEH UNIT MEDIA DAN KOMUNIKASI
PEJABAT MENTERI BESAR JOHOR***